

# MARKO

---

## Xoão Kapatxisareri Sāpiretakiti

(Mateo 3.1-12, Arókasi 3.1-20, Xoão 1.19-28)

**1** <sup>1</sup>Ia Xesosi Kristo iokanapirena erekari. Teoso ākiri itxaua Xesosi.

<sup>2</sup>Teoso sākire sāpiretakani iōkatsopataria ia:

Niokanatariko niokanapirena aniākari kākitemoni kimapori oeretini īkapani pite uai apokini apisa.

<sup>3</sup>Iua auako āparaā makipakaniātaā. Isāpirenauatako:

“Hōeretariko kimapori Apiananiri apokini apisapanika.

Itīkaāpo erekari hīkamako iua napini īkapani,” itxa iua.

Itxa Teoso sākire iōkatsopatakori kitxakapirīka.

<sup>4</sup>Ikara atoko Xoão kapatxisareri āparaā makipakaniātaā aua. Ipatxisatakasaakiri kākiti, isāpiretari ia pirena:

—Hītakanapariko maerekati hīkamakiti. Hīpatxisataākako.

Ininiā Teoso makatxakariko maerekati hīkamakiti —itxa Xoão kapatxisareri.

<sup>5</sup>Ikinimane kākiti Xotéia auakani Xerosareē sitatxiti auakani pakini sari Xoāomoni isākire ikenakotinina īkapani. Ninoa sāpiretakasaakiri maerekati ikamakitina, ipatxisatana uini Xotão inakoriātaā.

<sup>6</sup>Xoão takari imāka kamero piti kamakori. Itakari ipakiomatare pirātxi mata kamakori. Inikari txītxiri. Mapaā itxima. <sup>7</sup>Iua txari kākitemoni:

—Nota poiāori. Nota tikini apokako apiatakari. !Apakata nikapotoreēkiniua iua takote ikiti mata nimakatkakini īkapani, kotxi nota poiāoka. Iua apiata. <sup>8</sup>Nota patxisatai āparaānokara. Iua

patxisataiko Erekarí Matamatakotiã. Iuasaaki hĩte apakapariko Erekarí Matamatakoti.

### **Xesosi Patxisatiko Pirena**

*(Mateo 3.13-17, Arókasi 3.21-22)*

<sup>9</sup>Iuasaaki Xesosi apoka Nasaree sitatxiti, Kariréia tōpamoni. Iuasaaki Xoão kapatxisareri patxisatari iua uini Xotão inakoriãtaã. <sup>10</sup>Xesosi kanĩkiitakasaaki, iua itikari iaxiti takakini. Iuasaaki Erekarí Matamatakoti katxaka kamoã katxakini atoko. Iua nopini apoka. <sup>11</sup>Iuasaakipeka Teoso iaxitikiri txari:

—Pite namarite, nitiretakiti, napokaerekatai, kotxi ninirekakiti pikama.

### **Satanasi Atamakaerekatiniri Xesosi**

*(Mateo 4.1-11, Arókasi 4.1-13)*

<sup>12</sup>Iuasaaki Erekarí Matamatakoti iokanatarí Xesosi ãparaã makipakaniãtaã. <sup>13</sup>Iuaãtaã ikaikota koarẽta õti. Iuasaaki Satanasi atamakaerekatari iua. Iuaãtaã auari kaxipirini kaneenamarini. Ininiã Teoso nitiriakori iaxitikini nĩkatari Xesosi.

### **Xesosi Mipotorikiniri Iparĩka Kariréia Tōpa**

*(Mateo 4.12-22, Arókasi 4.14-15)*

<sup>14</sup>Xoão kateia ãki takikosaaki, Xesosi sari Kariréia tōpamoni. Iuaãtaã isãpiretari Teoso iokanapirena erekarí, Teoso auĩtetxi ininiãua pirena. <sup>15</sup>Itxari:

—Teoso keto apopeka. Iua auĩtetxi ininiua apokaãpotapeka. Ininiã hĩtakanapariko himaerekani. Hãuikariko Teoso iokanapirena erekarí —itxa Xesosi.

<sup>16</sup>Xesosi tĩpokota Kariréia poati tĩniã. Iuasaaki atamatana ipi hetxi takakani, Simão Petro, itari Átree pakini. Iua atamatana itakinirina hetxi. <sup>17</sup>Ininiã Xesosi txana:

—Uatxa masa notakata. !Himaĩkaikariko ximaki. Átiã hĩparĩka auako. Nisãkire hĩsãpiretako kãkitimoni —itxa.

<sup>18</sup>Ininiã iuasaaki ninoã takanapari hetxi, sa itxana Xesosikata.

<sup>19</sup>Apikomoni ninoã saãpota. Itikana Txiako, itari Xoão pakini. Ninoã Sepeteo anaakori. Kanauã miramanerí ãki auanãtana iuasaaki. Hetxi iotsaãnãtana. <sup>20</sup>Iuasaaki iua akiritana ninoã. Ininiã

ninoa takanapari iri, iri nitiriakori pakini kanaua āki. Eereka isana Xesosikata.

### **Kiki Maerekati Matamatakoti Auaītotakiti**

*(Arókasi 4.31-37)*

<sup>21</sup>Xesosi imoianariakorikata apoka Kapanaoō sitatxiti. Ininiā tomatiko ōtisaaki Xesosi sari aiko Xoteo apotiitiniātaāua oerekarauatini ĩkapani. <sup>22</sup>Iua sākire kenakotakani tsorĩkaāta, kotxi kona kaiōkatsoparerini atokoni !itxa. Iua oerekakiti sākiretxiti pataparari, kotxi !isāpiretari āti koerekareri sākire apanakini kaiōkatsoparerini atoko. Iuaka sākirekara isāpireta.

<sup>23</sup>Iuasaaki aiko āki Xoteo apotiitiniātaāua aua kiki maerekati matamatakoti auakiti. Iua akiripoakata:

<sup>24</sup>—Xesosi Nasaree sitatxitikiri. Kipa pinireka atemoni? Pite ina ate pixipokini ĩkapanikani? Erekarinoka kamakarii. Teoso nakiti pitxaua —itxa.

Ikara atoko iua akiripoakata, kotxi iua maerekati matamatakoti pĩkari Xesosi.

<sup>25</sup>Ininiā Xesosi itapararitika txari:

—Piotoka. Pitakanapariko ere kiki ĩto.

<sup>26</sup>Iuasaaki maerekati matamatakoti iōkokaītotari. Ikatxakasaaki, akiripoakata.

<sup>27</sup>Kākiti iuaātaā auakani tsorĩkaāta. Iuasaaki imisākiretakakauana:

—Kiripa? Atxiīti oerekakori sākiretxiti amaneri apopeka? Iua sākire kaposotiireri. Ipaniātakiti maerekati matamatakoti kamapeka —itxanātana.

<sup>28</sup>Ininiā ikara pirena iaripireta ikini Kariréia tōpati.

### **Xesosi Makananitiniro Simão Petro Imakiro**

*(Mateo 8.14-15; Arókasi 4.38-39)*

<sup>29</sup>Ininiā Xesosi, Txiako, Xoão pakini takanapakasaakiri aiko Xoteo apotiitiniātaāua, isana Simão, Ātree pakini aapokomoni.

<sup>30</sup>Iuasaaki Simão imakiro apoomata. Osirĩkanāta. Ininiā ninoa sāpiretari Xesosi oamianare. <sup>31</sup>Ininiā Xesosi sari oamoni. Imaĩkaro ouako. Ōkitikaro. Iuasaakipeka oāpoomare !auaika. Ininiā opotorika oparĩkauatini, ninoa kiena okamini ĩkapani.

### Xesosi Makananitinina Amianatakani

(Mateo 8.16-17; Arókasi 4.40-41)

<sup>32</sup>Ininiã mapiãnikata kãkiti minana ikinipoko amianatakani, maerekati matamatakoti auaĩtotakini pakini iuamoni. <sup>33</sup>Ininiã ikinimane iua sitatxi auakani apotiitaua aapokotxi tore takote. <sup>34</sup>Ininiã Xesosi makananitana itomaneri amianatakani. Kaiãopokori amianari auakini imakananita. Apaka omitikana itomaneri maerekani matamatakoni. Iuasaaki !auiritana ninoa sãkirauatini, kotxi ninoa imarotari Teoso ãkiri ininiua Xesosi.

### Xesosi Sãpiretiniri Teoso Sãkire

(Arókasi 4.42-44)

<sup>35</sup>Íkanõkapanika mapiãpanika Xesosi õkitikaua. Itakanapari aapokotxi. Iuanoka sari kãkiti mauakaniãtaã iri iaxitikiri imisãkiretini íkapani. <sup>36</sup>Eereka Simão imoianariakorikata sari Xesosi initinina íkapani. <sup>37</sup>Ninoa apokasaakiri, itxana:

—Ikinimane nitai —itxarina.

<sup>38</sup>Xesosi apakapapiretana:

—Masa ãtiãtaã kãkiti aapokomoni. Iuaã nisãpiretariko Teoso sãkire, kotxi ikara atoko itxa nipaĩka kãkitimoni. <sup>39</sup>Xesosi sari ikini Kariréia tõpa. Aiko Xoteo apotiitiniãtaãua isãpiretari Teoso sãkire. Apaka omitikana maerekani matamatakoni kãkiti ãtoã auakani.

### Kiki Maere Matati

(Mateo 8.1-4, Arókasi 5.12-16)

<sup>40</sup>Amianatakari maere matati apoka Xesosimoni. Ikapotoreẽkaua iua apisatoõ. Iua iteene amanaãri:

—Nimarotari, pinirekiniãri piposotari erekape pitxĩkitakinino —itxa.

<sup>41</sup>Ininiã iuasaaki Xesosi iteene tiretari iua. Itakari iuako iua nopini. Itxari:

—Ari, ninirekapitikari. Erekapekai uatxa.

<sup>42</sup>Iuasaakipeka amianari !auaika. Erekapekari iua.

<sup>43</sup>Xesosi iokanatarari iua. Iuasaaki isãpiretari iua:

<sup>44</sup>—Kona pisãpiretapiri apanakini pitemoni nikamakiti. Uatxa merepanika pisa sasetotxiakorimoni. Poerekari piĩto ninoamoni. Eereka pikamariko Moisesini paniãtakiti. Ikara atoko oerekari kãkiti atõ erekapeka pinini —itxari.

<sup>45</sup>Iuaritika isãpiretapikari Xesosi kamakiti. Ininiã iaripireta ikara pïrena. Ikara xika Xesosi !liposotaika isini aapokotximoni. Ikaikota kãkiti mauakaniãtaã. Iuaritika kãkiti sari iuamoni.

### Matïpokotakati Pirena

(Mateo 9.1-8; Arókasi 5.17-26)

**2** <sup>1</sup>Eereka mapaõtipeka inaka atoko iuaïkana Xesosi Kapanaoõ sitatxiti apoka itxa. Iaripireta Xesosi inirimane aapoko apokini. <sup>2</sup>Iuasaakipeka mirikiniti kãkiti apoka iuamoni, ininiã iua aapokotxi xãpoka. Apotiitauana ïronakikoãtaã apaka. Ininiã !apakata apanakini kãkiti ïroini aapokotxi ãki. Iuasaaki Xesosi sãpiretari Teoso sãkire kãkitimoni. <sup>3</sup>Iuasaaki ipi ipi pakini kikiakori minari matïpokotakati. <sup>4</sup>Kãkiti itomaneri ïronakikoãtaã aua, ininiã kona iposotarina Xesosi takote apokinina. Ininiã aapokotxi nopini, Xesosi manapi ninoa sonatari iua matïpokotakati iokatxakinina tïkane Xesosimonikari. Iposo atoko isikakaãpotarina iua manapi. <sup>5</sup>Xesosi imarotari ninoa atão auikiniri iua sãkire. Ininiã Xesosi txari matïpokotakatimoni:

—Namarite, pimaerekani makatxakapeẽkaika —itxa.

<sup>6</sup>Iuasaaki ãtikaka kaiõkatsopareriakori topãkanãta iuaã. Ixirikaãnãtana. Ixiniiremoninani:

<sup>7</sup>—Kinirepa ia kiki ikara atoko itxa? Maerekati isãpiretakiti, kotxi Teosonanira posotari imakatxakiniri kãkiti maerekani —itxa ninoa sãkire.

<sup>8</sup>Iuasaakipeka Xesosi imarotari ninoa xinikakiti ãkixiniireãna. Ininiã Xesosi txana ninoa:

—Kininiãpa ikara atoko hïtxa xinireta? <sup>9</sup>Nitxari iua imaerekani nimakatxakini, txamari !himarotari imaerekani atão nimakatxakini. “Põkitikaua. Pisirimata pikoseka, sipe pitxa,” nininiã, iuasaaki himarotari nisãkire atão ininiãua, kotxi hïtikari. Niposotiire imaerekani nimakatxakini ïkapani, niposotiire iua nõkitikini ïkapanitxikana. <sup>10</sup>Ininiã uatxaika noerekai hïte, Teoso iokanatano nota hïtari iaxitikiri ïkorapokoritimoni kãkiti maerekani nimakatxakini ïkapani —itxana kaiõkatsopareriakori.

<sup>11</sup>Ininiã matïpokotakatimoni itxa:

—Põkitikaua. Pisirimata pikoseka, sipe pitxa paapokomoni —itxa.

<sup>12</sup>Iuasaakipeka iua õkitikaua. Ikosekari isirimata. ïkorape itxa ikinimane okiãtaã. Imakinika kãkiti tikoka.

—Peerekari Teoso kamakiti. Kona mitxi ate itikari ĩkora atoko inakari —itxanātana kākiti.

### **Mateo Pirena**

*(Mateo 9.9-13; Arókasi 5.27-32)*

<sup>13</sup>Ininiã iuaĩkana isari ipoamoni. Kaiãopokori kākiti apotiitaua iuakata. Iuasaaki oerekana ninoa. <sup>14</sup>Isaãpotakasaaki, atamatori Arevii inakori. Āti iuãka Mateo inaãka. Aopeo inakori ākiri itxaua iua. Iitopãkanãta auĩtetxiakori txineirote apakapiniãtaã. Ininiã Xesosi txari:

—Masa notakata.

Iuasaakipeka õkitikaua, Xesosikata sa itxa.

<sup>15</sup>Eereka Xesosi nipokota Arevii aapoko. Itori auĩtetxiakori txineirote apakapakani, itori apanakini maerekani, topãkanãta Xesosi takote, imoianariakori takote pakini. Kaiãopokori kākiti aua iuasaaki, kotxi kaiãopokori kākiti Xesosikata sikani. <sup>16</sup>Pariseoakori, kaiõkatsopareriakori pakini itikari Xesosi auĩtetxiakori txineirote apakapakanikata, apanakini maerekanikata pakini inipokotini. Ininiã kaiõkatsopareriakori, pariseoakori pakini pimaãna Xesosi moianariakori:

—Kinirepa hinipokota auĩtetxiakori txineirote apakapakanikata, maerekanikata? —itxana.

<sup>17</sup>Xesosi ikara ikenakotakasaaki, itxana:

—Kākiti mamianatakani kona nirekari kākiti pinĩtxi imarotakari. Amianatakaninokara nirekari pinĩtxi imarotakari. Nota uai apoka maerekani nakiritini ĩkapani, imaerekanina itakanapinina ĩkapani. Kona nakiritari kākiti “atão inakari kamakani” uãkatakaniua — itxa Xesosi.

### **Nipokori Takanapiko Teoso Misãkiretiko ĩkapani**

*(Mateo 9.14-17; Arókasi 5.33-39)*

<sup>18</sup>Āti õti Xoão moianariakori, pariseoakori pakini takanapari inikinina Teoso imisãkiretinina ĩkapani. Iuasaaki kākiti pimaãri Xesosi:

—Kinirepa Xoão moianariakori, pariseoakori pakini takanapari inikinina Teoso imisãkiretinina ĩkapani, txamari pite moianariakori kona ikara atoko !itxana.

<sup>19</sup>Ininiã Xesosi:

—Kiiniri kākiti ñtanorouatakasaaki, ñtanorouatakari aua iuaã, ininiã kona kākiti takanapari inikini iusaaki. Kona iua ñtanorouatakari nirekari kākiti natxitini. Ininiã iua auakasaaki ninoakata, ikinimane nipokota.

<sup>20</sup>Ininiã nota ñtanorouatakari atoko nitxa. Nota auakasaaki nimoianariakorikata, kona itakanaparina inikinina Teoso imisäkiretinina ñkapani. Ñti õti nota !auaika nimoianariakorikata. Iusaakiikarako itakanaparina inipokotinina Teoso imisäkiretinina ñkapani.

### **Amaneri Măkatxi Pirena**

<sup>21</sup>Kona kākiti tăpanetari măkatxi kitxakari măkatxi mata amaneriã. Măkatxi mata amaneri itxikika, ininiã kitxakari tsorakita.

### **Amaneri Sako Aamata Kamakori**

<sup>22</sup>Kona kākiti takari iãriã amaneri sako kitxakari aamata kamakori ãki. Itakiniãri, koanatchi kitxakari aamata kamakori tsorakita, ininiã iãriã xikepoata, ininiã koanatchi !kikeikari. Sako amaneri ãki itakaãka iãriã amaneri. Iua atokokana kona hĭkoketari kitxakari sãkiretxiti amaneri sãkiretxitikata.

### **Tomatiko Õti Pirena**

*(Mateo 12.1-8; Arókasi 6.1-5)*

<sup>23</sup>Tomatiko õti Xesosi imoianariakorikata napaãpota kikio triko takikoãtaã. Ininiã ninoa makatxakaro triko iki mapaki inikinirona ñkapani. <sup>24</sup>Pariseoakori atamatana, ininiã itxarina:

—Kinirepa ninoa parĭkauata tomatiko õtisaaki? —itxana.

<sup>25</sup>Ininiã Xesosi apakapapiretana:

—Kona hătatsopatapanikari Taviini kamakiti? Iua, imoianariakorikata natxitikasaaki, kona himarotatari ikamakiti? <sup>26</sup>Iua ĭroã Teoso misäkiretikoãtaã. Apiataa inakori sasetotxi auĭte apiatakari iusaaki. Iuaã Tavii nikari komiri Teosomoni sikakori. Sasetotxinokara auiritaãka iua komiri inikinina. Apanakini !auiritaãka inikiniri. Txamari Tavii sikari imoianariakori inikinina ñkapani.

<sup>27</sup>—Tomatiko õti kamaãka, kākiti ĭto ereka inini ñkapani. Kona kākiti kamaãka tomatiko õti auini ñkapani. <sup>28</sup>Nota hĭtari iaxitikiri posotari ikinipoko ninireĕkiti nikamini tomatiko õtisaaki, kotxi Apiananiri nitxaua —itxa Xesosi.

**Motĩkauakotakari Pirena**  
(Mateo 12.9-14; Arókasi 6.6-11)

**3** <sup>1</sup>Iuaĩkana Xesosi imoianariakorikata ĩroã aiko Xoteoakori apotiitiniãtaãua. Iuaã apokari kiki motĩkauakotakari. <sup>2</sup>Ininiã iuaã auakani txari

—Atxiĩti iua erekapeka txĩkitakari motĩkauakotakari uatxa tomatiko õtisaaki?

Ninoa xinikari ikara atoko inini, kotxi ninoa kinirão apoĩtaka txari Xesosi. <sup>3</sup>Ininiã Xesosi akiritari iua motĩkauakotakari:

—Uaimoni pina —itxari.

<sup>4</sup>Iposo atoko ipimaãna iuaã auakani:

—Kipa atão Teoso paniãtaua akamini tomatiko õtisaaki? Maerekati akaminikani? Erekari akaminikani? Ipaniãtataua ãti amakananitini? Ipaniãtataua ãti aõkini?

Txamari ninoa !kasãkirena. <sup>5</sup>Xesosi atamatana. Iuusaaki inaiataua, iuaritika imatinaniuata, kotxi ninoa !nirekari atão imarotinina. Ininiã Xesosi txari iua motĩkauakotakari:

—Pisirĩkauakota —itxari.

Ininiã itamẽkauakota. Erekape itxa iuako. <sup>6</sup>Ininiã pariseoakori potorika iuaã. Isana Erotxi sãkire auiãkanimoni. Iuaãtaã ninoa xinikari Xesosi okaenetinina.

**Itori Amianatakani Sari Xesosimoni**

<sup>7</sup>Ininiã Xesosi sari Kariréia poamoni. Iuusaaki itori kãkiti Kariréia tixinikini, Xotéia tixinikini pakini sari iuamoni. <sup>8</sup>Xerosareẽ sitatxitikini, Itoméiakini, Xotão ipiniãkini, Txirokini, Sitoõkini pakini sari iuamoni. Ninoa kenakoenetari ikamakiti, ininiã iuamoni isana. <sup>9</sup>Ininiã ipaniãtana imoianariakori:

—Kanaua himina, kotxi kaiãopokori kãkiti katikaãpotano. Ininiã kanaua ãki niereẽtaua —itxa Xesosi.

<sup>10</sup>Iuusaaki kaiãopokori kãkiti erekapeka itxĩkitakapeka. Apanakini amianatakani nirekakari imaãtakinirina Xesosi, erekapeka ininina ĩkapani. Ininiã ikatikaãpotarina Xesosi, kotxi kaiãori kãkiti. <sup>11</sup>Maerekati matamatakoti auakini atamatakasaakiri Xesosi, irikana Xesosi apisatoõ. Akiripoatana:

—Teoso ãkiripitikai pite.



<sup>12</sup>Ininiã Xesosi kona auiritana ninoa: “Teoso ãkiripitikai,” ininina.

### **Xesosi Mereëna Tosi Imoianariakori**

*(Mateo 10.1-4; Arókasi 6.12-16)*

<sup>13</sup>Iposo atoko Xesosi sari õtanoxiratarimoni, akirita itxana inirekaãkini. Ininiã ninoa sari iuamoni. <sup>14</sup>Ininiã iua mereëna tosi kikiakori iuakata kaikotakani tĩkane, Teoso sãkire sãpiretakani ĩkapani. <sup>15</sup>Iua sikari iposotiire ninoamoni, amianatakani erekapeka itxĩkitakinina ĩkapani, apaka maerekati matamatakoti omitikinina ĩkapani. <sup>16</sup>Ininiã akiritari Simão. Xesosi takauãkatari Simão ãti iuãka. Petro itxaua. <sup>17</sup>Akiritana Txiako, itari Xoão pakini. Sepeteo anaakori itxauana. Xesosi takauãkatana ninoa Poanexi. Poanexi Popĩkari sãkireẽ “Ikarokirauari anaakori.” <sup>18</sup>Akiritana ãtree, Piripi, Patoromeo, Mateo, Tomee, Txiako pakini. Aopeo ãkiri itxaua iua Txiako. Akiritana Tateo, Simão pakini. Homano omanatakari iua Simão. <sup>19</sup>Akiritari Xotasi Isikariotxi inakori apaka. Xesosi mĩkapiritakari itxaua iua Xotasi Isikariotxi. Pakini Xesosi akiritakini imoianariakori ininiuana ĩkapani.

### **Maerekani Matamatakoni Omitikiko**

*(Mateo 12.22-32; Arókasi 11.14-23; 12.10)*

<sup>20</sup>Iuaĩkana ãti aapokotxitimoni isa Xesosi, imoianariakorikata. Iuasaaki mirikiniti kãkiti iuaĩkana apotiitaua. Ikara atoko ininiã kona ninoa nipokota. !Apakata inipokotinina, kotxi mirikiniti kãkiti aua iuaã. <sup>21</sup>Xesosi nirimane kenakotari kãkiti apotiitiniua iuakata. Ininiã isana iua apinina ĩkapani.

—Imapitxiritapeka —itxana.

<sup>22</sup>Kaiõkatsopareriakori Xerosareẽ ĩkani apoĩtari Xesosi maerekati ikamini. Ninoa sãkire:

—Peosepoo inakori auaitotari iua. Ininiã Peosepoora omitikari maerekati matamatakoti —itxana.

Peosepoo Satanasi itxaua. Apanakini sãkire:

—Maerekani matamatakoni auĩte sikaposotiiretari Xesosi maerekati matamatakoti omitikini.

<sup>23</sup>Ininiã Xesosi akiritari kãkiti isãkire ikenakotinina ĩkapani. Sãpirenatxi atão inakari oerekiko isãpiretana ninoa. Ipimaãna:

—Natokopa itxa Satanasika omitikiniua? <sup>24</sup>Auĩtetxi tixine auakani naiatakakiniãua, ixipokaãkanako. <sup>25</sup>Kãkiti aapoko ãki auakani ninoakakarika neenamauatiniã, ixipokaãkanako

apaka. <sup>26</sup>Iua atokokana, Satanasi nitiriakori, ninoakakarika naiatakakiniäua, Satanasi tapara xipokako.

<sup>27</sup>—Kona käkiti iroã kiki mitapoari aapoko äki iitiriuatini iġapani. Kinirão iitiriuatata, ininiã iaxirikari mitari mitxi. Iposo atoko inirekaäkiti iitiriġka.

<sup>28</sup>—Ari, atãopitikara nota txai hġte. Apakata Teoso makatxakiniri ikinipoko maerekati käkiti kamakiti, imaerekani Teoso imisãkirepiretini pakini. <sup>29</sup>Txamari atipekana maerekati kamakari aua. Erekari Matamatakoti misãkirepiretakari maerekani makatxakiko kona auari. Ikara atoko inakani inikoriãriko imisiritiko maerekani misiritikoãtaã —itxa Xesosi.

<sup>30</sup>Xesosi ikara atoko itxa, kotxi pariseoakori txari: “Iua auari maerekati matamatakoti.”

**Xesosi Inoro, Itariakori Pakini**  
(Mateo 12.46-50; Arókasi 8.19-21)

<sup>31</sup>Iuasaaki itariakori inorokata apoka porikiti. Ipaniãtarina äti akiritiniri Xesosi. <sup>32</sup>Iuasaaki itori käkiti topãkakani äkitari Xesosi. Isãpiretarina:

—Pitariakori, pinoro apaka porikiti aua. Initanãtai —itxarina.

<sup>33</sup>Ininiã Xesosi apakapapireta:

—Kiripa nitariakori, ninoro pakini?

<sup>34</sup>Iua atamatana itakote topãkakani:

—Hãtamata, uai aua ninoro, nitariakori pakini. <sup>35</sup>Teoso nireëkiti kamakani nitariakori, nitaroakoro, ninoro pakini itxauana —itxa Xesosi.

**Katakareri Pirena**  
(Mateo 13.1-9; Arókasi 8.4-8)

**4** <sup>1</sup>Iuaĩkana Xesosi oerekarauata ipoa takote. Käkiti mirikiniti, ininiã imorõkokaua kanaua äki. Iitopãka. Ninoa aua imiriĩ, ininiã iua kanauaã oerekarauata. <sup>2</sup>Itori Teoso sãkire oerekana ninoa sãpirenatxi atão inakari oerekikoã. Itxana:

<sup>3</sup>—Hĩkenakota. Katakareri takarauata. <sup>4</sup>Itakarauatakasaaiki itakareki irika kimapori tiniãpo. Ininiã kotipiriki nikari itakareki.

<sup>5</sup>—Apanakini itakareki irika kai auiniãtaã, kipatxi mauakaniãtaã. Atãoka ipitxaka. <sup>6</sup>Kipatxi poiãoka auiniã atokatxi pataka apokasaaiki itxarika. Omakotsani xika osonãka. <sup>7</sup>Apanakini irika inako sauaki. Inako aneëkasaaiki, okari takari. !Iriuata. Ipinga.

8—Apanakini irika kipatxi auiniãtaã. Ininiã iriuata. ãti poiãoka iriuata, trítakata. ãti apiata iriuata, sesétakata. ãti kaiãopoko iriuata, seĩkata.

9—Kakenakokii, ininiã hĩkenakotariko nisãkire —itxa Xesosi.

### **Kãkiti Mimarotakiniti Xesosi Sãpiretini Pirena**

*(Mateo 13.10-23; Arókasi 8.9-15)*

10Iuanani imoianariakorikata auakasaaki, ipimaãrina Xesosi: —Poerekaua mixikanani sãpirenatxi atão inakari oerekiko pisãpiretakiti? —itxarina.

11Ininiã isãpiretana:

—Teoso sãkire mauĩãkani !imarotari Teoso auĩtetxi ininiua. Teoso oerekai hĩte ninoa mimarotakiniti. Teoso oerekana ninoa isãkire sãpirenatxi atão inakari oerekikoã. 12Atxiĩti ninoa iteene atamatarari Teoso oerekakiti, iuaritika !imarotarina atamatakitina. Atxiĩti iteene ikenakotarina Teoso sãkire, iuaritika !imarotarina ikenakotakitina. Imarotaãkamariko, akiritaãkamariko Teoso, ininiã Teoso makatxakamariko ninoa maerekani.

13Ininiã Xesosi txari:

—Himarotatarari ikara sãpirenatxi atão inakari oerekiko?

—!Aimarotari —itxana.

—Ininiã natokopa ininiãparako himarotatarari apanakini sãpirenatxi atão inakari oerekiko?

14Ininiã imimarotakininitina oerekana:

—Iua takarauatakarari takari Teoso sãkire. 15Aua kãkiti kimapori tiniãpo takarekitxi irikiniãtaã atoko inakani. Ininiã Teoso sãkire ikenakotakasaaki Satanasi apoka. Ininiã imakatxakari Teoso sãkire ãkixinireẽna apokakari.

16—Aua kãkiti kai auiniãtaã atoko inakani. Ninoa kenakotakasaakiri Teoso sãkire, iuasaakipeka apakaparina ipoxokoniritikana. 17Itxamana, kona kakotsari. Imaxikiko apokiniã, imisiritiko Teoso sãkire auikinina xika apokiniã, iuasaaki itakanaparina Teoso sãkire.

18—Aua kãkiti aanaia auiniãtaã atoko inakani. Ninoa kenakotapitikari Teoso sãkire. 19Txamari maerekaxiniretinoka itxana. Txineironoka inirekana, ininiã ikara misirienetana ninoa. Kaiãopokori inireẽkitina, Teoso manirekakiniti. Maerekaxiniretinoka ininina, txineiro, inireẽkitina pakini inako atoko itxa, ininiã !ixinikaikarina Teoso sãkire, ininiã kona iriuata.

<sup>20</sup>Aua kākiti kipatxi erekari auiniātaã atoko inakani. Ninoa auikari Teoso sākire. Iriuatana. Āti iriuata poiãoka, trítakata. Āti iriuata apiata, sesêtakata. Āti iriuata ito, seĩkata.

### **Tirikapi Pirena**

*(Arókasi 8.16-18)*

<sup>21</sup>Xesosi pimaãna ninoa:

—Nanipa hítakari tirikapi? Kopiti ákikani hítakatari? Amesa patapikani hítakatari? Konapitini. Hítakari itano imakinika iopinikini ĩkapani. <sup>22</sup>Iomaãtakori áti ôti oerekaãkako. Kipatakori oerekaãkako, kotxi nota imarotapitikari hĩkamakiti. <sup>23</sup>Kakenakokii, ininiã hĩkenakotariko nisãkire —itxa Xesosi.

<sup>24</sup>Xesosi sãkirauatapanika:

—Hítakaõtxikariko nisãkire. Imakinika hĩkenakotako. Erepaniko pikamakiti átimoni, kotxi pite kamakititxikana kamaãka pitemoni. Erepaniko, kotxi apiata ikamaãka pitemoni. <sup>25</sup>Teoso sākire auakiti, iua sākire kĩpitakari, Teoso sikari apikomoni imaroretxi iuamoni. Txamari Teoso sākire kenakotakari, isãkire makĩpitakati, imarore xapiti iuamoni auakari makatxakaãkako.

### **Takariki Pirena**

<sup>26</sup>Apikomoni Xesosi txari:

—Teoso auĩtetxi ininiãua kiki takariki taãkari atoko itxa. <sup>27</sup>Itakarauata. Imaka ĩkanõka. Āti iparĩka ikama pokamara. Iusaaki itakare pitxakapeka. Kona iua imarotari otomorekini. <sup>28</sup>Merepanika otomoreka. Iposo atoko opitxaka. Eereka opa aua. <sup>29</sup>Oaneẽpeka onakasaaki katakareri makoapataro, kotxi oamiko manapipeka itxa. Ikara atoko itxa Teoso auĩtetxi ininiãua.

### **Mostata Pirena**

*(Mateo 13.31-32; Arókasi 13.18-19)*

<sup>30</sup>Xesosi sãkirauatapanika. Itxari:

—Natokopa itxa Teoso auĩtetxi ininiãua? Īkiripa sãpirenatxi atão inakari oerekiko oerekaua? Ia atoko itxa: <sup>31</sup>Teoso auĩtetxi ininiãua mostata oki atoko itxa. Axapitikiro oa. Apanakini iki apiata. <sup>32</sup>Otakaãka atoko opitxaka. Eereka oaneẽ. Apanakini takari ĩtano apiata oa. Amaripokoro okati. Kotipiriki takari okoa okatiã. Iua atokotxikana Teoso auĩtetxi ininiãtaãua.

Merepanika poião kākiti. Eereka apiata. Eereka kaiāopokori kākiti auītetari Teoso. Txamari iuasaaki Satanasi apoka ninoamoni kotipiriki apokini atokokana.

<sup>33</sup>Kaiāopokori sāpirenatxi atāo inakari oerekiko isāpiretana, Teoso sākire imarotinina ĩkapani. Ninoa imarotakasaakiri isākire, apiata isāpiretana. Imimarotakanisaakiri isākire, poiāonoka isāpiretana. <sup>34</sup>Teoso sākire oerekasaakina ninoa, sāpirenatxi atāo inakari oerekikonoka isāpireta. Eereka imoianariakorinoka auakasaaki iuakata, oerekana ikara imarotinina ĩkapani.

### Xesosi Iotokakiniri Ītima

(Mateo 8.23-27; Arókasi 8.22-25)

<sup>35</sup>Iua ōtipanika mapiānikata itxana imoianariakori:

—Maĩpiriāta ipoa. Ipiniāmoni masa —itxana.

<sup>36</sup>Ininiā itakanapana itomaneri kākiti. Iuasaaki imoianariakori anikari Xesosi kanauaã. Apanakini kanaua axapitiri apaka sari ninoakata. <sup>37</sup>Īpiriātakasaakina ĩtima kataparari apoka ninoamoni. Tsakati kataparari, ininiā āparaã ierepeēpokataua kanaua āki. Kanaua sakikaariāpotape.

<sup>38</sup>Iuasaaki Xesosi ikapokiāmoni imakanāta. Isirimata nopini imakanāta. Ninoa ōpirĩkari iua:

—Kona pimaākataua ate. Kona pitiretataua? Apinanapanoka —itxana.

<sup>39</sup>Ininiā imereka. Ipinitari ĩtima:

—Piotoka. Auapika pitxako —itxari ipoa.

Ininiā itsorĩkaxitita. Ītima iotoka. Tsakati iotoka apaka. <sup>40</sup>Ininiā Xesosi:

—Natokopa ininiāpa kapĩkarei hĩte? Kinirepa hĩte kona auikano nota? —itxana ninoa.

<sup>41</sup>Apiapĩkareta ninoa. Ininiā ninoa:

—Kinakaripa ia kiki, kotxi ĩtima, tsakati pakini auikari iua sākire —itxana.

### Kiki Maerekani Matamatakoni Auaitotakiti

(Mateo 8.28-34; Arókasi 8.26-39)

**5** <sup>1</sup>Xesosi imoianariakorikata apoka ātiātaã Xerasa tōpa, Kariréia poa ipiniā. <sup>2</sup>Xesosi kanĩkiitakasaaki, kiki ina iuamoni. Iua akauariātaã auakari. <sup>3</sup>Iuaātaã iua auanāta. Kākiti ĩliposotari iĩtxikiniri iua. Iĩtxikare metao kamakori karakitapekata.

<sup>4</sup>Kaiãokatani kãkiti itxikari iuako, ikiti pakini metaoã, txamari ikakarakitsatari metao. !Apakata kãkiti nĩkatiniri iua. <sup>5</sup>ĩkanõka, pokamara pakini ixirataãtaã akiripoanãta akauari auiniãtaã. Kai soroã iuaka ikisauakitataua. <sup>6</sup>Õtakopanika atapari Xesosi inini. Ininiã imiteẽkata iuamoni. Ikapotoreẽkaua iua apisatoõ.

—Apiananiri pitxaua —itxa.

<sup>7</sup>Akiripoakata:

—Xesosi, Teoso ãkiri pitxaua. Apiananiri ãkiri pitxaua. Kipa pinireka nota ĩkapani? Teoso uãkaã namanaãĩ pite, kona pimisiritapeno —itxa maerekati matamatakoti. <sup>8</sup>Ikara atoko itxa kotxi Xesosi paniãtari:

—Maerekati matamatakoti pisipeka. Pitakanapari ere kiki —itxari.

<sup>9</sup>Xesosi pimaãri:

—Kipa piuãka? —itxari.

Iua apakapapiretari:

—“Itori” ninaãka niuãka. Kotxi itori maerekani matamatakoni ate.

<sup>10</sup>Iteene iua amanaããpotari Xesosi:

—Kona piokanatapeua ãtiãtaã.

<sup>11</sup>Iuasaaki auari kaiãopokori irari ixiratamoni nipokonãtakani.

<sup>12</sup>Maerekati matamatakoni iteene amanaãri Xesosi:

—Piokanataua ate irarimoni. Pauiritaua ate sini ninoamoni —itxanãtana.

<sup>13</sup>Ininiã Xesosi iokanatana. Iuasaakipeka maerekani matamatakoni takanapari iua kiki, ĩroã itxana irari ĩtomoni. Iuaãtaã auari ipi mio irari. Ninoa ĩroãkasaaki, irari miteẽkata oiokiriĩtini ipoamoni. Komoka, axãpoãta itxana iuasaaki.

<sup>14</sup>Irari nĩkatakani miteka sitatximoni, aapokotxi poião auinimoni pakini. Isãpiretana kãkiti itikakitina. <sup>15</sup>Eereka isana Xesosimoni. Iuasaaki atamatarina kiki mitxi maerekati auaitotakiti. Iitopãkanãta. Mãkatxi auapekari. Atão ĩkitapeka auari. Iuaritika ninoa pĩkarauata. <sup>16</sup>Itikakani sãpiretari apanakini iua kiki pirena, irari pirena pakini.

<sup>17</sup>Kãkiti iuaãtaã auakani paniãtari Xesosi osipikiniri iuaãtaã.

<sup>18</sup>Xesosi iereẽtakasaakiua kanaua ãki, iua kiki amanaãri iuakata isini ĩkapani. <sup>19</sup>Xesosi !auritari. Itxari:

—Pisa pinirimanemoni. Pisãpiretana Apiananiri kamakiti pite ĩkapani. Pisãpiretana iua iteene iamoniĩkai pite. <sup>20</sup>Ininiã iua sipe. Iuaãtaã auari sitatxi tesi pakini. Iua kiki sari ninoa tesi sitatxitimoni. Isãpiretari kãkiti Xesosi kamakiti iua ĩkapani. Iuaãtaã auakani tsoriãkaãta:

—Anekani, peerekari Teoso —itxana.

### **Xáiro Amanaãkiti Pirena**

*(Mateo 9.18-19, Arókasi 8.40-42)*

<sup>21</sup>Ininiã eereka Xesosi ñpiriãta ipoa. Ininiã ipoa itiniã kaiãopokori kãkiti apotiitaua iuakata. <sup>22</sup>Aiko Xoteo apotiitiniãtaãua sikani auite apoka iuamoni. Akiritaãka Xáiro iua. Iua kapotoreẽkaua Xesosi apisatoõ. <sup>23</sup>Iua iteene amanaãri Xesosi: —Namarite opinanapanoka. Masa notakata. Pitakari piuako oa nopini erekape onini ñkapani.

<sup>24</sup>Ininiã Xesosi sari iuakata. Kãkiti kinapokope itxakata isinina.

### **Xesosi Mãka Maãtakakaro**

*(Mateo 9.20-22, Arókasi 8.43-48)*

<sup>25</sup>Iusaaki sito amianatakaro apoka. Tosikanani oa arẽka liotoka. <sup>26</sup>Okinika otxineiroteẽ oïkitxitapekari oamianare imarotakani. Kaiãopokori ipitamaro. Txamari ninoa !iposotari imaktxakinirina oamianare. Kona erekaro. Apiata oamianare. <sup>27</sup>Okenakoenetakasaakiri Xesosi napini, osari iuamoni. Omaãtakari imãka, <sup>28</sup>kotxi oamoni: “Nimaãtakiniãri imãka, iusaakiika erekapekano,” otxanãta oxinikakiti. <sup>29</sup>Ininiã omaãtakasaakiri, oarẽka iotoka. Iusaakiika oamarotari erekape onini.

<sup>30</sup>Iusaakiika Xesosi posotiire sari oamoni. Ininiã ikirioka kãkiti sauaki. Eereka ipimaãna:

—Kipa maãtakatari nimãka? —itxa.

<sup>31</sup>Iusaaki imoianariakori apakapapiretari:

—Apiananiri, patamata. Itomaneri kãkiti kinapokopeka, iuaritika pite pimaãri kãkiti: “Kipa maãtakatano?” pitxa —itxana.

<sup>32</sup>Iuaritika Xesosi nitari imãka maãtakakari. <sup>33</sup>Iusaaki oa sito imarotari erekape onini, ininiã okapotoreẽkaua iuamoni. Opïkarauata. Okikinanaka. Eereka osãpiretari ikinika oamianare iuamoni. <sup>34</sup>Ininiã Xesosi txaro:

—Namarite, pite erekapekai uatxa, kotxi pauikari niposotiire. Pispiniikaua, erekaxinirepekai —itxa Xesosi.

### **Xáiro Ñkero Õkitikiko**

*(Mateo 9.23-26, Arókasi 8.49-56)*

<sup>35</sup>Xesosi sãkirauatakasaaki oakata, apanakini Xáiro nitiriakori apoka. Itxari:

—Pamarite !auaika. Opĩpeka. Pauiritari Xesosi kanapiriini.

<sup>36</sup>Ininiã Xesosi !imaãkatari ikara pirena. Itxari Xáiro:

—Kona pipĩkarauatape. Pauikano —itxari.

Ininiã ninoa sari Xáiro aapokomoni. <sup>37</sup>Xesosi auiritana Petro, Txiako, Txiako itari Xoão pakini sini iuakata. !Auiritana apanakini sini iuakata. <sup>38</sup>Ninoa apokasaaki Xáiro aapoko, kãkiti iuaãtaã auakani !imarotarina ikamakitina. Ikinipoko kãkiti txiapanãta, akiripoakanãtana. <sup>39</sup>Xesosi iroã. Itxana:

—Kinirepa iteene hĩtxiapanãta? Kinirepa hãkiripoanãta? Amarini !ipina. Oimakanãta —itxa.

<sup>40</sup>Ininiã inapetarina iua. Ininiã iokanatana ninoa mapara. Oĩri, onoro, Xesosi moianariakori pakini iroã amarini auiniãtaã.

<sup>41</sup>Imaĩkarouako. Iuasaaki isãpiretaro oa isãkire:

—Taritaa komii.

Popĩkari sãkireẽ: “Amarini põkitikaua.” <sup>42</sup>Iuasaakipeka oõkitikaua. Otĩpokota. Oa amarini aua tosi anokanani. Iuasaaki ninoa iteene tsorĩkaãta. <sup>43</sup>Ininiã Xesosi paniãtana:

—!Hĩsãpiretapiri apanakini nimakananitiniro oa.

Apaka ipaniãtana isikakienatiniro oa.

### Nasaree Auakani Kona Auikari Xesosi Sãkire

*(Mateo 13.53-58, Arókasi 4.16-30)*

**6** <sup>1</sup>Xesosi imoianariakorikata potorika iuaã. Nasaree sitatxitimoni isana. Iuaãtaã mitxi Xesosi aneẽ. <sup>2</sup>Tomatiko õtisaaki iua oerekari kãkiti aiko Xoteo apotiitiniãtaãua. Xesosi sãkire kenakotakani tsorĩkaãta. Itxana:

—Nanipa apaiaõkarauata, ikara atoko imarotini? Kipa oerekari imarore? Ikamakiti oerekari apiata imarore aua. Kininiãpa ĩkora atoko itxa posotiireta? <sup>3</sup>Ate imarotari iua, kotxi aapokotxi kamakari itxaua iua. Maria ãkiri iua. Iua itariakori Txiako, Xosee, Xota, Simão pakini itariakori itxauana. Itaroakoro apaka aua uai, ininiã ate imarotari iua —itxana.

Ikara xika kona ninoa auikari isãkire.

<sup>4</sup>Ininiã Xesosi txana ninoa:

—Teoso sãkire sãpiretakari paxitaãka, txamari Teoso sãkire sãpiretakari itixineẽ auakasaaki, iuaã auakani, inirimane, iua aapoko ãki auakani pakini !ipaxitari. !Auikarina iua sãkire —itxa.



<sup>5</sup>Ininiã iuaã kona ikamari iposotiire apiari. Iuako itaka ãtikaka amianatakani nopini, ininiã amianatakani erekapeka itxĩkitaka. <sup>6</sup>Itsorikaãta, kotxi iuaã auakani !auikari isãkire. Ininiã iua tōpa isari aapokotximoni. Oerekarauata iuaã. Eereka isari apanakini aapokotxitimoni. Iuaĩkana oerekarauata. Itxaãpota iuaãtaã.

**Xesosi Iokanatana Imoianariakori Kãkitimoni.**

*(Mateo 10.5-15; Arókasi 9.1-6)*

<sup>7</sup>Xesosi akiritana imoianariakori tosi pakini. Ipi iokanata ãtiãtaã, iuaĩkana ãtiãtaã iokanatana ipi. Ikara atoko iokanaãpotana imoianariakori. Iposotiire isikana ninoa maerekani matamatakoni omitikinina ĩkapani.

<sup>8</sup>Itxana:

—Kona minakati hanikape. Hĩtsonerenoka hanika. Kona hĩtij, kona auatxi, kona txineiro !hanikape. <sup>9</sup>Hĩkiti mata hĩeretaka. ãtika kasipiri himãka hanika. <sup>10</sup>Sitatxi hãpokasaaki, ãtika aapokotxinanirako hãua. Iua sitatxi hãuakasaaki, hĩkaikota iua kãkiti aapoko. Kona hãuape ãti kãkiti aapoko. <sup>11</sup>Kãkiti mapakapanisaakii, hĩsãkire imakenakotakanisaakina, ininiã hĩtakanapana. Hĩpotorikasaaki, hĩkaxipokari kipatxi hĩkiti mataã auakari, ininiã ikara atoko hõerekana ninoa maerekani ininiuana. Kãkiti misiritiko sãpiretiko õti apokasaaki, Sotoma sitatxiti auakani misiritiko auapitika. Iuasaaki Komoha sitatxiti auakani misiritiko auapitika. Iuaritika sitatxi auakani hĩte mapakapakani misiritaãkako apiata iuasaaki.

<sup>12</sup>Ininiã isana. Isãpiretari kãkiti imaerekani itakanapini.

<sup>13</sup>Mirikiniti maerekati matamatakoti iokanatana. Iĩtxiã itakana amianatakani nopini. Ininiã erekapeka itxĩkitakana amianatakani.

**Xoão Kapatxisareri Ipinini**

*(Mateo 14.1-12; Arókasi 9.7-9)*

<sup>14</sup>Auĩtetxi Erotxi inakori kenakopiretari Xesosi pirena. Xesosi uãka iaripireta ikini tōpati. Ininiã Erotxi xinikanãta:

—Ikara Xesosi, Xoão kapatxisareri itxaua. Uatxa iua õkitikapekaua. Iuakara Xesosi itxa. Ininiãkara iposotiire auuamoni.

<sup>15</sup>ãtikaka uãkatari Xesosi Eríasi ininiuua. ãtikaka uãkatari Xesosi Teoso sãkire sãpiretakari kitxakapirĩka ininiuua.

<sup>16</sup>Ikara Erotxi kenakopiretakasaaki, itxari: —Xoãokara nitsotakakiitakitikara iua Xesosi txa. Ip̄pekarriika iuaĩkana òkitikapekaua —itxa.

<sup>17</sup>Mitxi Erotxi takaro itari Piripi ìtanoro. Ouãka Erotxia inakoro. Oa xika Erotxi maĩkari Xoão. Iaxiriĩtotari, kateia ãki taka itxari.

<sup>18</sup>Xoão takaãka kateia ãki, kotxi itxari Erotximoni:

—!Erekari pitari ìtanoro pitakini —itxari.

<sup>19</sup>Ikara xika Erotxia apaka omanatari Xoão. Oa iteene kinirão okaka otxamari Xoão. Kona oposotari oòkiniri iua, <sup>20</sup>kotxi Erotxi p̄ikari Xoão. Iua imarotari, atão inakarínoka kamakari, erekarínoka kamakari ininiua Xoão. Xoão sãkire ikenakotakasaaki, ìteene ìmarotari isãkire, iuaritika iua apokaerekatari ikenakotiniri isãkire.

<sup>21</sup>Erotxi kamari isaiã kiiniriti. Iua kemaĩtxitana sotato auĩteakori, Kariréia auakani auĩteakori, apanakini auĩteakori pakini. <sup>22</sup>Ininiã Erotxia ãkero apoka iua kiiniritiã. Iuasaaki oserenapirĩkata Erotxi apisatoõ, ikemaĩtxitakini apisatoõ pakini. Ninoa potxitari oserenini. Ininiã Erotxi txaro oa ãtokoro:

—Pinirekakiti pamanaãno, ininiã nisikai. <sup>23</sup>Atãopitikara nisikai pamanaãkiti. Nitixine pinirekiniã, ipixini nisikai —itxaro.

<sup>24</sup>Ininiã oa miteka onoromoni. Oa pimaã txaro onoro:

—Kiripa namanaãtari? —otxaro.

Ininiã onoro txaro:

—“Xoão Kapatxisareri kii prato nopini ninireka,” pitxari. Ikara atoko pamanaãri iua —otxaro.

<sup>25</sup>Ininiã katimariã okanapiriã kiiniri auiniãtaã iuaĩkana. Katimariã auĩtetximoni osa. Oamanaãri iua:

—Ninirekari Xoão kapatxisareri kii prato nopini —otxa.

<sup>26</sup>Ininiã Erotxi maerekaxiniretinoka itxa, kotxi mitxi iua sãpiretaro oa amanaãkiti isikiniro oa ikemaĩtxitakini apisatoõ. Ininiã ìpakata imasikakaniãri isikaenetakiti. <sup>27</sup>Ininiã katimariã ipaniãtari sotatoakori okiniri Xoão:

—Ikii himina —itxa.

Ininiã isana kateiamoni. Itsotakakiitarina Xoão. <sup>28</sup>Pirato nopini itakarina ikii, sika itxarona ãtokoro. Ininiã oa sikari onoromoni.

<sup>29</sup>Ininiã Xoão moianariakori kenakopiretakasaakiri Xoão okiko pirena, isana kateiamoni. Aparina iĩto. Itakarina iĩto kai iriko ãki.

### Sīko Mio Kākiti Xesosi Sikakienatini

(Mateo 14.13-21; Arókasi 9.10-17; Xoão 6.1-14)

<sup>30</sup>Ininiã Xesosi iokanatakini kanapiriã iuamoni. Apoka itxana Xesosimoni. Isãpiretarina ikamakitina, oerekakitina pakini. <sup>31</sup>Iuasaaki kaiãopokori kākiti aua iuaãtaã, ininiã !apakata inipokotinina. Ininiã:

—Amasipeka kākiti mauakaniãtaã atomatini ïkapani —itxana.

<sup>32</sup>Ininiã kanauaã iereëtauana. Ìpiriãtarina ipoa. Isana kākiti mauakaniãtaã. <sup>33</sup>Kākiti itikari Xesosi inapaãpotini, ininiã ninoa miteka. Iopiriãrina ipoa koropoa, apoka itxana Xesosi apisapanika.

<sup>34</sup>Iua kanïkiïtakasaaki apisamoni mirikiniti kākiti, ininiã iamoniãkana, kotxi soti auïte ipitikiri mauakiniti atoko itxana. Iuasaaki Xesosi oerekana kaiãori Teoso sãpiretakiti.

<sup>35</sup>Ininiã mapiãpeka inaãpotiniã, Xesosi moianariakori iuamoni apoka. Itxarina:

—Kona kākiti aapoko auari uai. Uatxa mapiaãpopeka. <sup>36</sup>Ininiã pipaniãtana kākiti isinina ïkapani nipokori iamotinina tïkane.

<sup>37</sup>Ininiã Xesosi:

—Hïtekarako sikakienatana ninoa —itxana.

Ininiã ninoa:

—Pinirekatari asini komiri aamotini ïkapani? Oito kasiriti kākiti parïkauatini ïki anireka komiri ïki naia kākiti nikini ïkapani —itxana.

<sup>38</sup>Ininiã Xesosi pimaãna ninoa:

—Kipakinipa komiri katari aua? Hãtariko —itxa.

Ninoa imarotakasaakiri, apoka iuamoni. Itxana:

—Sïko pakini komiri katari, ipi ximaki pakini aua —itxarina.

<sup>39</sup>Xesosi paniãtana ikinika kākiti topãkini katsotati nopini. <sup>40</sup>Ätiãtaã iitopãkana sïkoëta, ipinimoni iitopãkana seï. Imaikinikana ikara atoko itxaãpotana iitopãkinina.

<sup>41</sup>Ininiã Xesosi kosekari sïko pakini komiri, ipi ximaki pakini. Iuasaaki ionakaãta iaxiti:

—Erekapitikari pisikakiti —itxa.

Eereka imaxiõpekarari komiri. Isikari imoianariakori. Imoianariakoripekana sikaãpotana apanakini. Iuaïkana imapirinikari ximaki, xanaka itxari imakinikana. <sup>42</sup>Ikinimanekana nipokota, kamitopeka itxana. <sup>43</sup>Ininiã imoianariakori apotiitari ximaki itetakori, komiri itetakori pakini. Tosi pakini kotari xãpoka itetakori. <sup>44</sup>Iuasaaki sïko mio kikiakori nipokotakani.

### Xesosi Ipoa Nopini Itĩpokotini

(Mateo 14.22-33; Xoão 6.15-21)

<sup>45</sup>Xesosi takapiretakasaakiri kãkiti, iuasaaki iokanatana imoianariakori ĩpiriãtinina iua apisa, Petsãita tixinimoni isinina ĩkapani. <sup>46</sup>Xesosi takapiretanapaka atoko, mitaxiratarari nopini isa Teoso imisãkiretini ĩkapani. <sup>47</sup>Mapiãpe inakasaaki kanaua ipoa apanĩkakiãxitipeka aua. Iuasaaki Xesosi imiriĩpanika aua.

<sup>48</sup>Xesosi atamatana ninoa, itaparanoka itxana imekoãtinina, kotxi ĩtima, tsakati pakini anikaãpotana ninoa. Ininiã ikatimaãpotakasaaki, Xesosi apokaãpota ninoamoni. Itĩpokota ipoa nopini. Inapaãpoaritana imoianariakori. <sup>49</sup>Ininiã ninoa atapakasaakiri ipoa nopini itĩpokotini, ninoa uãkatari kamiri. Ininiã ninoa akiripoakata. <sup>50</sup>Ininiã iua misãkiretana:

—Kataparaxinire hĩtxako. Notakara. Na !hĩpĩkarauatape —itxana imoianariakori.

<sup>51</sup>Eereka kanauaã iereẽtaua. Iuasaaki ĩtima iotoka itxa. Ininiã itikokitatana ninoa. Itsoriãkaãtana:

—Kiripa atxiĩti? —itxana.

<sup>52</sup>Ikara atoko isãkirena, kotxi kona ixinikaikarina Xesosi posotiire komiri ixanakasaaki. Paikoxinirena ninoa iuasaaki.

### Xesosi Makananitana Amianatakani Xenesareekini

(Mateo 14.34-36)

<sup>53</sup>Xesosi imoianariakorikata ĩpiriãtari ipoa. Isari Xenesaree tixinimoni. <sup>54</sup>Ikanĩkiĩtakasaakina apanakini itikari Xesosi.

—Xesosira —itxana.

<sup>55</sup>Ininiã imitekana kãkiti auinimoni amianatakani apinina ĩkapani. Anikana isirimatana nopini Xesosimoni. <sup>56</sup>Ikini sitatxiti kãkiti amianatakani sirĩka kimapori tiniãpo. Amanaãrina Xesosi auiritinina ninoa imãka itikakinina. Ikinikana imãka tikakakani erekapeka itxĩkitaka.

### Xoteoakori Iikite Pirena

(Mateo 15.1-9)

**7** <sup>1</sup>Ininiã pariseoakori, kaiõkatsopareriakori pakini, Xerosareẽ ĩkani, apotiitaua Xesosikata. <sup>2</sup>Iuasaaki itikarina Xesosi moianariakori marokapiotakanua nipokori inikinina apisa. Ininiã itxana:

—!Erekari imarokapiotakaniuana —itxana.

<sup>3</sup>Pariseoakori, imakinikana Xoteoakori apaka kamari ikiomaneakori kitxakapirīkarini sākire iaōka. Inipokotinina apisapanika arokapiotauana.

<sup>4</sup>Nipokori amotikoātaā Xoteoakori sikasaaki, eereka apokasaakina aapokona imarokapiotakaniūuana kona inipokotana. Tiitxi iākoanatxi, kopiti, apanakini itiina pakini arokasaakina ikiomaneakorini oerekakiti iaōka arokana.

<sup>5</sup>Ininiā pariseoakori, kaiōkatsopareriakori pakini pimaāri Xesosi:

—Kinirepa pimoianariakori kona kamatari kitxakapirīka atoko ininina? Kinirepa marokapiotakanikaua inikarina nipokori? —itxarina.

<sup>6</sup>Ininiā Xesosi apakapapireta:

—Mitxipitipanika Isaía sāpiretai hīte. Atāo iua sākire, kotxi hīsākire atxiīti erekari, txamari kona hīkamari hīsākire iaōka. Iua txari:

Kamisirienererini ninoa kākiti. Ninoa sākireēnanira ipaxitanona. Ākixinireēna !inirekanona.

<sup>7</sup>Maxikatiīka ninoa kapotoreēkaua nota apisatoō. Maxikatiīka ninoa txano: “Ateosone pitxaua,” kotxi ninoa !oerekari nota sākire. Ninoaka sākire oerekana, txamari “Teoso sākire asāpiretai” itxana.

Ikara atoko Isaía iōkatsopatakiti Teoso sākire.

<sup>8</sup>—Ininiā hītakanapapekari Teoso sākire, kākiti oereēkiti hīkamini īkapani. <sup>9</sup>Hītakanapapikari Teoso paniātakiti, hinirekaākiti hīkamini īkapani. <sup>10</sup>Kitxakapirīka Moisesi txari:

Pipaxitariko piri. Pipaxitaroko pinoro. Piri, pinoro pimisākirepiretiniā, pokaākako,

itxa Moisesi sākire. <sup>11</sup>Txamari hīte oerekari kākiti: “Kākiti auakiti iri, inoro pakini nirekiniā, iua manirekakaniāri isikiniri ninoamoni, isāpiretana: ‘Ia nota auakiti nisika Teosomoni.’” Ininiā !isikari ninoa nirekakiti ninoamoni. Ikara atoko inakari kākiti sikakiti Teosomoni, hīte takauākatari “Kopaā.” <sup>12</sup>Ininiākara hōerekari kākiti imatiretakanina iri, inoro pakini. !Apakata hōerekakiti. <sup>13</sup>Ikara hōerekakiti xika kona hīte maākatari Teoso sākire. Apiata hinirekari kākiti oereēkiti. Auapanika itori hōereēkiti sākiretxiti ikara atoko inakari —itxa Xesosi.

### Ākixiniretxi Txiko Pirena

(Mateo 15.10-20)

<sup>14</sup>Xesosi iuaĩkana akiritana ikinimane kākiti. Itxana:  
—Hikinika hīkenakota. Hītakaōtxikariko nisākire. <sup>15</sup>Imakinika hinikakiti, mapara auakari. !Ikamari ate maerekani. Hīxinireē potoriākarira kamari maerekanitxi. <sup>16</sup>Kakenakokii, ininiā hīkenakotariko nisākire —itxa Xesosi.

<sup>17</sup>Ikinimane kākiti itakanapaka atoko, aapokotxi āki ĩroā. Iuasaaki imoianariakori pimaāri:

—Pisāpiretaua mixikanani pisāpiretakiti —itxana.

<sup>18</sup>Ininiā iua txari:

—!Kiikitei hīte. Kona hīte imarotatari hinamaā ĩroākari kona kamari maerekanitxi. <sup>19</sup>Kotxi ĩroākari !isari hīxiniremoni. Hītikako āki isa. Iposo atoko hītikatakasaaki inapa. Ikara atoko ininiā, erekari ikinipoko kākiti niākiti.

<sup>20</sup>—!xinireē potoriākarari iuara kamari kākiti maerekani.

<sup>21</sup>Kākiti ākixinire ipotorika ixinikakiti maerekati, anokaretxi, ĩtiriuatakatxi, okaniuatakatxi, āti kākiti ĩtanorokata isirĩkini nire pakini. <sup>22</sup>Kākiti ākixinireē ipotorika itirenani, maerekati Satanasi oerekakiti, misirieneretxi, pētauatakatxi kamakari, xikotakatxi, āti misākirepiretiko, iuikiniua, miikiteti inini pakini. <sup>23</sup>Ikinika ikara maerekati kākiti ākixinire auakari txikotari kākiti xinire —itxa Xesosi.

### Xoteo Minakatoua Auikiniri

*Xesosi Sākire*

(Mateo 15.21-28)

<sup>24</sup>Xenesaree tixini Xesosi potorika. Txiro sitatxiti tōpa, Sitoō tixini pakinimoni isa. Iuaā kākiti aapoko ĩroā. Kona inirekari kākiti imarotiniri iua auiniātaā. Txamari !iposotari iomaātiniua. Kākiti imaroāpotari iua auiniātaā. <sup>25</sup>Sito apoka Xesosimoni, kotxi oa kenakopiretari Xesosi pirena. Maerekati matamatakoti auaitotaro oimi. Oāpokasaaki Xesosimoni, okapotoreēkaua iua apisatoō.

<sup>26</sup>Oa sito sākiretari Kreko sākire. Āto uāka oa. Siropenísia tixinikero oa. Okapotoreēkasaakiua Xesosi apisatoō, oamanaāri Xesosi:

—Pomitikenatariko maerekati matamatakoti namarite ĩtoā auakari —otxari.

27 Ininiã Xesosi:

—Xoteo !pitxaua. Maparakerorai. Pite nirekakari nisikinii Xoteoakori nakiti. Amarini mitxi nikini atão. !Erekari nokiniri amarini kiena anãpamoni —itxaro oa.

28 Oa apakapapireta:

—Atãopitikara ikara atoko pitxa, kotxi nota maparakerero, anãpa atoko Xoteoakorimoni. Iuaritika kãkiti auiritari anãpapiki nikiniri nipokori katxakakari amarini nipokotiniãtaã patapi —otxari Xesosi.

29 Ininiã Xesosi apakapapireta:

—Erekari papakapapiretini, ininiã paapokomoni pisa. Maerekati matamatakoti !luaika pamarite ãtoã —itxaro.

30 Oaãpoko oãpokasaaki, oãpokaro oamarite sirĩkanãta. Erekapekaro oa. Maerekati matamatakoti asikapekaro.

### Makenakoreti Pirena

31 Eereka Xesosi takanapari Txiro sitatxiti tõpa. Ìpirixititari Sitoõ tixini. Sitatxi tõpa tesi pakini ìpirixitita. Apoka Kariréia poamoni.

32 ãtikaka kãkiti minari makenakoreti Xesosimoni. !Iposota atão isãkirauatini. Ninoa iteene amanaãri Xesosi:

—Piuako pitaka iua nopini kakenakorepeka inini ìkapani —itxana.

33 Xesosi anikari iua kiki kãkiti mauakaniãtaã. Itakari iuakoki ikĩpita ãki. Eereka ikiisoka, taka itxari ienemaã masãkireti nini nopini. 34 Eereka ionakaãta iaxiti, oõka itxa:

—Epataa —itxa.

Popĩkari sãkireẽ, “Piauãka.” 35 Iuusaakipeka ikenakoki auãka, ininiã kakenakorepeka itxa. Iuusaaki inini poiõpeka apaka. Eereka erekapeka itxa isãkirauatini. 36 Ininiã Xesosi txana ninoa:

—Kona hĩsãpiretapiri apanakini nimakananitiniri iua.

Txamari apiata ninoa sãpirenauata. 37 Kãkiti tsorĩkaãta:

—Ikinika ikamakiti peerekari. Makenakoreti kakenakorepeka itxa. Mimatasaãkiretakati, kasãkirepeka itxa —itxana.

### Xesosi Sikakienatana Ipi Ipi Pakini Mio Kãkiti

(Mateo 15.32-39)

**8** 1 Eereka mapaõti itomaneri kãkiti apotiitaua Xesosimoni. Nipokori xipokapeka, ininiã Xesosi akiritana imoianariakori. Itxana ninoa:

2 —Nota amonĩkana naia kãkiti, kotxi ipi õti, ãti õti pakini õtipeka auana notakata. Ininiã uatxa nipokori !luaika.

<sup>3</sup>Niokanatiniãna auinimoni manipokotakatipanikana, ininiã ipixiniãpo iõkapetana. Irikana. Ætikaka õtako ãkani kona apakata manipokotakanika isinina —Xesosi txana imoianariakori.

<sup>4</sup>Imoianariakori apakapapireta:

—Uai aapokotxi mauakaniãtaã, ininiãkara nãpa aãpokari nipokori ito naia kãkiti asikakienatini ãkapani? —itxana.

<sup>5</sup>Ininiã Xesosi:

—Kipakinipa komiri katari hitemoni aua?

—Setxinokara komiri aua atemoni —itxana.

<sup>6</sup>Ipaniãtari kãkiti topãkini ixiti. Imaãkari iua komiri setxi.

—Erekari pisiãkiti —itxari Teoso.

Iposo atoko imaxiõpekari komiri, sika itxana imoianariakori.

Imoianariakori sika itxana apanakinimoni. <sup>7</sup>Ninoamoni aua

ãtikaka ximaki axapitiri. Ininiã Xesosi txari:

—Ia erekari —itxa Teosomoni.

Eereka ipaniãtana imoianariakori sikiniri kãkitimoni. <sup>8</sup>Ininiã ikinipoko kamitopeka itxana. Iposo atoko apotiita itxarina itetakori.

Xãpokaka itxarina setxi kotarina. <sup>9</sup>Ninoa komiri nikakani ipi ipi pakini mio kãkiti. Kamitopeka itxana.

Ininiã itakapiretanapana ninoa. <sup>10</sup>Iposo atoko imoianariakorikata iereẽtaua kanaua ãki. Taomanota tõpamoni isana.

### **Pariseoakori Nirekari Xesosi Oerekiniri Iposotiire**

*(Mateo 12.38-42; 16.1-4; Arõkasi 11.29-32)*

<sup>11</sup>Pariseoakori apoka Xesosimoni. Inirekarina Xesosi kerokiniri, ininiã itxarina Xesosi:

—Takaõtxikari, Teoso posotiire poerekaua ate, aãtamatiniri ãkapani, Teoso iokanatinii ãkorapokoriti aimarotini ãkapani — itxarina. <sup>12</sup>Ininiã Xesosi oõka. Itxari:

—Kinirepa kãkiti uatxarini nirekari noerekiniri Teoso takaõtxikare, iposotiire? Atãõpitikara nota txai hite, kona noerekai hite.

<sup>13</sup>Ininiã itakanapana. Iereẽtaua kanaua ãki. Ikanapiriã ipoa ipiniãmoni iuaãkana.

### **Pão Tireẽkari Pirena**

*(Mateo 16.5-12)*

<sup>14</sup>Xesosi moianariakori maxinãkaretari pão. Ætika pão porii kanaua ãki aua. <sup>15</sup>Ininiã Xesosi õtãkikana:



—Erepaniko, pamonõkoniri pariseoakori, Erotxi pakini pãote tireẽkari —itxa Xesosi.

<sup>16</sup>Xesosi moianariakori misãkiretakakaua:

—Ikara atoko itxaua, kotxi amaxinĩkaretari pão.

<sup>17</sup>Xesosi imarotari ninoa sãkire, ininiã itxana:

—Kinirepa hĩsãkirauanãta pão mauakani xika? Kona himarotatapanikari niposotiire? Kona hiĩkitetapanikari? Kona hinirekatari hãuikiniri nisãkire? <sup>18</sup>Kokimai, txamari, !hãtamatarari. Kakenakokimai, txamari !hĩkenakotari nisãkire. <sup>19</sup>Kona hĩxinikapanikari iuasaaki nimaxiõpekitakiti sĩko komiri, sĩko mio kãkiti nisikakienatini? Kipakinipa kotari itetakori hĩxãpokaka? —ipimaãna.

Ininiã ninoa apakapapireta:

—Tosi kotari axãpokaka.

<sup>20</sup>Xesosi txana ninoa:

—Eereka ãti õti nimaxiõpekari setxi komiri porii. Nisikari ipi ipi pakini mio kãkiti. Itetakori hãpotiitakiti, kipakinipa kotari hĩxãpokaka? —ipimaãna.

Ininiã ninoa:

—Setxi kotari axãpokaka.

<sup>21</sup>Ininiã Xesosi:

—Ininiã kinirepa kona hiĩkitetapanikari?

### **Mõsiãreti Petsáita Aapokotxitikiri**

<sup>22</sup>Xesosi Petsáita aapokotxitimoni apoka. Iuasaaki kãkiti minari mõsiãreti iuamoni. Amanaãrina Xesosi maãtakiniri iua mõsiãreti.

<sup>23</sup>Ininiã iua anikaãpotari iuakoã kãkiti mauakanimoni. Iuaã iminapari ienemaã mõsiãreti okiã. Eereka taka itxari iuako iĩtoã. Ipimaãri iua:

—Kõsiãrepekai? —itxari.

<sup>24</sup>Ininiã iua atamata.

—Nota itikapokotapeka, txamari nitikari kãkiti tĩpokotakari aamina atoko —itxa.

<sup>25</sup>Iposo atoko Xesosi iuaĩkana takari iuako mõsiãreti nopini. Eereka mõsiãreti atão itikapokotapeka. Ikinipoko atamata. <sup>26</sup>Ininiã Xesosi iokanatarari:

—Pisipeka paapokomoni. Kona pisipe Petsáita aapokotxitimoni, kotxi kona ninirekari pisãpiretiniri nikamakiti kãkitimoni —itxa Xesosi.

**Petro Auikari Xesosi Teoso Mereëkiti Ininiãua**

*(Mateo 16.13-20; Arókasi 9.18-20)*

<sup>27</sup>Eereka Xesosi imoianariakorikata sari kãkiti poiãoka auinimoni, Sesaréia-Piripi sitatxiti takote isana. Ipixiniãpo Xesosi pimaãna imoianariakori:

—Kiripa kãkiti uãkatano nota? —itxa.

<sup>28</sup>Ninoa apakapapireta:

—Xoão kapatxisareri iuãkataka. Apanakini “Eríasi inakori” iuãkataka. Ininiã apanakini “Teoso sãkire sãpiretakari” iuãkataka —itxana Xesosi moianariakori.

<sup>29</sup>Iuaĩkana Xesosi pimaãna:

—Hitepekana, kipa hite uãkatano? —itxana.

Ininiã Petro apakapapiretari:

—Teoso mereëkiti, kãkiti iãtapanãtakiti pitxaua —itxari.

<sup>30</sup>Ininiã Xesosi txana imoianariakori:

—Teoso mereëkiti nininiu !hísãpiretapiri apanakini —itxa.

**Xesosi Sãpiretari Ipinini**

*(Mateo 16.21-28; Arókasi 9.22-27)*

<sup>31</sup>Ininiã ia atoko oerekarauata:

—Nota hĩtari iaxitikiri iteene atatsiirauatako. Kiomãtxiakori, sasetotxi auĩteakori, kaiõkatsoparerini pakini kona nirekapanino nota. Nokaãkako. Eereka ipi ãti pakini õtisaaki iuaĩkana nõkitikauako.

<sup>32</sup>Ikara isãpireta ikinimane kãkitimoni. Ininiã Petro anikari iua maparamoni. Itxari:

—Kona ikara atoko !pitxape. Kona erekari pisãkire ikara atoko pinini —itxa Petro.

<sup>33</sup>Ininiã Xesosi kirioka imoianariakorimoni. Iua txitari Petro:

—Pisipiniikaua Satanasi. Pite nireëkiti kãkiti nireëkiti atokotxikana. Pite nireëkiti kona Teoso nireëkiti atokoni —itxa Xesosi.

**Xesosi Moianari Atão Inakari**

*(Mateo 16.24-28; Arókasi 9.23-27)*

<sup>34</sup>Xesosi akiritana kãkiti imoianariakori apaka. Itxana ninoa:

—Notakata kinirão sika pinakasaaki, piteka pinireëkiti kona pixinikape. Notakata kinirão sika pinakasaaki, nota misiritiko atokokana pimisiritaãkako. Ia atoko pinirekiniã, notakata

pisapitikako. <sup>35</sup>Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, Teoso iokanapirena erekari pisāpiretini xika, pite auapininiika txako Teosokata.

<sup>36</sup>Atxiīti papakapari ikinipoko tiitxi, ikini itixiti auakani tii, pinakiti ikapani. Atxiīti iua tiitxi xika kona pikīpitari Teoso sākire, ininiā kona pikaikota ātipirika Teosokata. Ikara atoko ininiā, erekari atxiīti ikinipoko tiitxi auinii? Konapitini. Apiaerekata Teosokata ātipirika pikaikotini, kotxi tiitxi iki poiāoka, pixinine karone apiata. <sup>37</sup>!Apakata kākiti iīkitxitiniri Teoso, iuamoni isini ikapani.

<sup>38</sup>Ikorsaaki kākiti linirekari Teoso. Inirekari maerekatina. Ikorsaaki pipētatiniano nota, pipētatiniani nota sākire, ininiākara nota kākiti itari iaxitikirino pētataiko pite, uai nikanapiriākasaaki. Nikanapiriākasaaki, niri iotximere aua notamoni. Nina niri nitiriakorikata, erekarinikata.

**9** <sup>1</sup>Xesosi txana nino: —Hīxinikariko ia nisākire. Apanakini hīte uatxa uai auakanii, hīpinini apisapanika himarotari Teoso auītetxi ininiāua. Auītetxi kaposotiireri itxaua —itxa Xesosi.

### Moisesi, Eríasi Pakini

(Mateo 17.1-13; Arókasi 9.28-36)

<sup>2</sup>Seisi pakini ōti napaka atoko Xesosi anikana Petro, Txiako, Xoão pakini oxiratarimoni, mitaxiratarimoni. Iuasaaki ninoanani aua iuaā. Iuaā auakasaakina, Xesosi ito ipinipo itxa.

<sup>3</sup>Imāka kasarori itxaua. Iotximere apaka auari. Ikara imāka saro atoko inakari, !auari. Kākiti iteene arokiniāri mākatxi, iuaritika ikara isaro atoko !auari. <sup>4</sup>Iuasaaki Eríasi, Moisesi pakini tokiā iuaā. Isākirauatana Xesosikata. <sup>5</sup>Ininiā Petro txari Xesosi:

—Koerekareri, erekapitikari uai aūuini. Makamari papiri ipi āti pakini, pite ikapani, Moisesi ikapani, Eríasi ikapani —itxa.

<sup>6</sup>Ikara atoko itxa Petro, kotxi !imarotaikari isākire, iteene ipīkarauatiniā.

<sup>7</sup>Iuasaaki katxiāri apoka ninoamoni. Katxiāri āki auana. Katxiāri āki Teoso txari:

—Ere namarite, nitiretakiti. Hīkenakotariko iua sākire —itxa.

<sup>8</sup>Katimaritika Xesosi moianariakori sapotorika. Itikapokotana. Mitxi Xesosikata sākirauatakani !auaika iuaā. Xesosinokara kaikota ninoakata.

<sup>9</sup>Otanoxiratarari iokiriiāpotakasaakina, Xesosi txana:

—Mixikanani hītikakiti !hīsāpiretapiri apanakini. Nota hītari iaxitikiri nipinaka atoko iuaīkana nōkitikaākaua atokoikarako, hīsāpiretariko mixikanani hītikakiti —itxana.

<sup>10</sup>Ininiā !isāpiretarina apanakinimoni. Ninoanoka isākirauanātana:

—Natokopa itxa kākiti ipīkaripeka iuaīkana ōkitikiniāua —itxanātana.

<sup>11</sup>Ipimaārina Xesosi:

—Kinirepa kaiōkatsoparerini sākire: “Teoso mereēkiti apokini apisapanikarako Eríasi apokako.” Kinirepa ikara atoko itxana?

<sup>12</sup>Ininiā Xesosi:

—Inipitikara Eríasi apoka merepanika, kākiti iposope inini īkapani. Teoso sākire iōkatsopatakori txari: “Kākiti itari iaxitikiri iteene atatsiirauatako. !nirekaākako.” Kinirepa ikara atoko itxa Teoso sākire iōkatsopatakori? <sup>13</sup>Nisāpiretaiko Eríasi apokapeka. Kākiti misiritapekari iuani. Inireēka iaōka imisiritarina. Teoso sākire iōkatsopatakori sāpiretapekari ikara ene —itxa Xesosi.

### **Amarini Maerekati Matamatakoti Auaītotakiti**

*(Mateo 17.14-21; Arókasi 9.37-43a)*

<sup>14</sup>Ninoa apokaāpotakasaaki apanakini imoianariakorimoni, atamatana kākítipokoni. Ninoa ākitana Xesosi moianariakori. Iuasaaki kaiōkatsoparerini kākítikata itaparakienetakaua.

<sup>15</sup>Iuasaaki kākiti atapari Xesosi. Ipoxoniritikana itxana:

—Xesosi napani.

Ininiā imitekana iuamoni, okapireta itxarina:

—Piteni?

<sup>16</sup>Ininiā Xesosi:

—Ari, notara.

Ipimaāna:

—Kininiāpa hītxitakakaua? —itxa.

<sup>17</sup>Ininiā kiki kākiti sauaki auakari apakapapiretari:

—Nota minamari namarite pitemoni. Maerekati matamatakoti auaītotari iua. !Auiritari namarite sākirauatini. <sup>18</sup>Iua maīkasaakiri, okaītotari iua xiti. Iuasaaki namarite sorikipeta. Akatsakatsiriītaua. Itorōkaītota. Ininiā nimisākiretamana pimoianariakori omitikiniiri maerekati matamatakoti, txamari ninoa !iposotari.

<sup>19</sup>Xesosi txari:

—!Kauikarei hïte. Maerekati kamakanii hïte. Kipakinikananipa Teoso nirekatari hïtekata nauini? Kipakinikananipa Teoso nirekatari hïte nimïteenekini? Himinari amarini notamoni —itxana.

<sup>20</sup>Ininiã ninoa anikari iua amarini Xesosimoni. Iuasaakipeka maerekati matamatakoti atamatari Xesosi. Iuasaakipeka maerekati matamatakoti txïkitakari amarini okaratiniua. Ininiã iua amarini iriãkata. Ikanapirikata, isorikipekata, itxïkitakari amarini. <sup>21</sup>Xesosi pimaãri iri:

—Kirisaakipa ipotorika ïkora atoko inini?

—Axapitipanikara ipotorika ïkora atoko inini. <sup>22</sup>Itokata maerekati matamatakoti okaïtotari xaminamoni. Itokata okaïtotari kãuaãrimoni. Inirekari okiniri iua. Piposotiniãri, pomitikariko maerekati matamatakoti. Piamonïkauako atepaniko —itxa iri sãkire.

<sup>23</sup>Ininiã Xesosi:

—Nota posotatari? Teoso sãkire auiãkari posotari ikaminiri ikinika —itxari.

<sup>24</sup>Iuasaaki iua kiki apakapapiretari iãsaritika:

—Nauikapitikari piposotiire. Axapitikinoka !nauikari, ininiã pisikaposotiiretano iteene pisãkire nauikini ïkapani.

<sup>25</sup>Isãkirauanãtakasaakina, kãkitipokoni miteëkata ninoamoni Xesosi kamakiti imarotininã ïkapani. Ininiã Xesosi itapararitika txitari maerekati matamatakoti:

—Pite maerekati matamatakoti. Pitxïkitakari kãkiti masãkireti inini. Pitxïkitakari kãkiti makenakokiti inini. Nota omitikai pite. Pipokïka. Iuaïkana !piïroãpinikako iua ïtoã —itxa Xesosi.

<sup>26</sup>Iua maerekati matamatakoti akiripoakata. Okaraïtokatari atoko, sipe itxa. Iua amarini ipïkari ïto atokopeka itxa. Ininiã apanakini kãkiti: —Ipipeka —itxarina.

<sup>27</sup>Ininiã Xesosi maïkauakotari. Ökitikari iua, ininiã itima.

<sup>28</sup>Xesosi aapokotxi ãki auakasaaki, iuanoka inakasaaki, imoianariakori pimaãri:

—Natokopa ininiãpa kona ate posotatari maerekati matamatakoti aomitikini? —itxana iuamoni.

<sup>29</sup>Ininiã Xesosi:

—Teoso pimisãkiretakasaaki, iuasaaki pimanipokotakaniãra, iuasaaki piposotari ikara atoko inakari maerekati matamatakoti pomitikini —itxa Xesosi.

### **Xesosi Iuaĩkana Sãpiretari Ipinini**

*(Mateo 17.22-23; Arókasi 9.43b-45)*

<sup>30</sup>Iuaã ipotorikana. Īpirixititarina Kariréia tōpa. Xesosi !nirekari apanakini kenakoenetiniri iua auiniãtaã. <sup>31</sup>Kotxi inirekari oerekinina imoianariakorinoka ipinini pirena. Ininiã Xesosi:

—Nota hĩtari iaxitikiri mĩkapiritaãkako. Nisikaãkako kikiakorimoni inirekaãkitina ikaminina tĩkane. Ninoa okano nota. Ipi õti ãti õti inakasaaki iuaĩkana nõkitikauako —itxa.

<sup>32</sup>Ninoa !imarotari Xesosi sãkire. Ninoa pĩkari ipimainirina iua.

### **Kiripa Kãkiti Apiatakari Txataua?**

*(Mateo 18.1-5; Arókasi 9.46-48)*

<sup>33</sup>Kapanaoõ sitatxiti apokana. Aapokotxi ãki auakasaakina, Xesosi pimaãna ninoa:

—Natokopa itxa hĩsãkire, uaimoni aĩkasaaki hĩtaparakienatakakasaakiua? —itxa.

<sup>34</sup>Masãkirenika itxana, kotxi kimaporiãpo ninoa sãkire: “Īkiripa ate apiatakari?” itxana. <sup>35</sup>Xesosi, iitopãka atoko, akirita itxana imoianariakori tosi pakini.

—Hĩkinika uaimoni hĩĩtopãka. Apiatakari pininiãua pinirekiniã, piteka poiãotakaua. Ikinimane nitiri pitxauako.

<sup>36</sup>Xesosi kosekari amarini, mina itxari imoianariakori sauaki, katarata itxari.

<sup>37</sup>—Papakapiniãri amarini pipoxokoniritika, papakapano nota apaka. Papakapiniãno nota, na notananini papakapa. Iuasaaki papakapari iua uaimoni niokanatakiri —itxa Xesosi.

### **Maerekani Matamatakoni Omitiãkari**

*(Arókasi 9.49-50)*

<sup>38</sup>Xoão sãpiretari Xesosi:

—Koerekareri, ate kenakotari kiki omitikinina maerekani matamatakoni pite uãkaã. Kona pimoianarini iua. Ininiã ate: “Ikara atoko !pitxape,” atxari.

<sup>39</sup>Ininiã Xesosi:

—!Hĩotokakapiri ikara ikamini. Kãkiti nota uãkaã maerekati matamatakoti omitiãkari, kona imisãkirepiretano. <sup>40</sup>Iua ate mokaiakari minakatiua. Atiretakiri itxaua. <sup>41</sup>Nota atãopitikara nitxai

hĩte. Atxiĩti kãkiti sikai ãparaã, kotxi Teoso mereẽkiti nakiti pitxaua. Iua kamakiti erekari, ininiã apakapapitikariko ikamakiti ĩki.

### Maerekati Oerekakari

(Mateo 18.6-9; Arókasi 17.1-2)

42!Erekari kãkiti mitari oerekiniãri amarini nota sãkire auiãkari maerekati ikamini. !Erekari. Erekamariko kai mitari iaxirikaãkamako iua kãkiti mitari nokiã, eereka okaãkamako ipoamoni ipinini ĩkapani. 43Piuako maerekati ikamãkitakiniãi, pitsotakari. Erekamariko ãtinani piuako Teosokata ãtipirika pauini ĩkapani, kotxi maerekati pikaminiã, pisa maerekani misiritikoãtaã. Iuaã xamina tirinapika. !Oakaãka. Atxiĩti piuako ipi aua, txamari pite sari iuaãtaã. !Erekari. 44Iuaã kĩtxi piĩtoã auakaro !opina. Xamina !oakaãka. 45Pikiti maerekati ikamãkitakiniãi, pitsotakari. Erekamariko ãtinani pikiti Teosokata ãtipirika pauini ĩkapani, kotxi maerekati pikaminiã, pisa maerekani misiritikoãtaã. Iuaã xamina tirinapika. !Oakaãka. Atxiĩti pikiti ipi aua, txamari pite sari iuaã. !Erekari. 46Iuaã kĩtxi piĩtoã auakaro !opina. Xamina !oakaãka. 47Poki maerekati ikamãkitakiniãi, pimakatxakari. Erekamariko ãtinoka poki auini Teoso auĩtetxi ininiãtaãua pisini ĩkapani, kotxi maerekati pikaminiã pisa maerekani misiritikoãtaã. Iuaã xamina tirinapika. !Oakaãka. Atxiĩti poki ipi aua, txamari pite sari iuaã. !Erekari. 48Iuaã kĩtxi piĩtoã auakaro !opina. Xamina !oakaãka.

49Iõkira nipokorimoni takiko atokokana xamina tirinakari takaãkako ikinimane kãkitimoni. Ikara atokokana ikinimane ataerekataãkako. 50Iõkira erekaro. Txamari iõkira koketikosaaki kipatxikata, !erekaikaro. !Apakata xinitxi piõkiratini ĩkapani. Atão iõkira atoko hĩtxako. !Hĩtxitakakapeua.

### Kiki ĩtanorokata Itakanapakakini

(Mateo 5.31-32; 19.1-12; Arókasi 16.18)

**10** 1Xesosi potorika iuaã. Xotéia tõpa isa. ĩpiriãkitari Xotão kãuaãriti. Iuaĩkana kãkiti apotiĩtaua iuamoni. Kaiãopokori kãkiti, ininiã oerekarauata, mitxi oerekarauanãtini atokokana.

2Kikiakori, pariseo inakanuia, apoka Xesosimoni. Ninoa nirekari Xesosi kerokiniri isãkire, ininiã ipimaãrina:

—Atãokani erekari kiki takanapiniro ĩtanoro?

3Ininiã Xesosi:

—Kiatokopa itxa Moisesi paniãtakiti?

<sup>4</sup>Ininiã ninoa:

—Moisesi paniātari kiki iōkatsopatiniri aātsopa, ĩtanoro itakanapini aātsopate, ininiã eereka auiritari iua iokanatiniro oa —itxana.

<sup>5</sup>Ininiã Xesosi:

—Moisesi auiritai hĩtanoro hĩtakanapini, kotxi paikori hĩxinire. Teoso nireĕkiti himanirekakani xikara, Moisesi auiritai hĩtanoro hĩtakanapini.

<sup>6</sup>Kotxi merepitipanika Teoso ikinipoko ikamakasaaki, ikamari kiki, sito pakini. <sup>7</sup>Ikara atoko ininiāpitikara, kiki takanapari iri, inoro pakini, ĩtanorokata auini ĩkapani. <sup>8</sup>Ininiã ātika atoko itxauana. Ininiã ipi kākiti litxaikauana. Ātinokara itxapekauana. <sup>9</sup>Ikara atoko ininiã, !erekari kākiti kaiarikiniri Teoso apotiitakini —itxa Xesosi.

<sup>10</sup>Eereka Xesosi imoianariakorikata kanapiriã aapokomonina. Iuaã apokasaakina, imoianariakori pimaāri iua ikara sākiretxiti iuaĩkana oerekinina ĩkapani. <sup>11</sup>Ininiã isāpiretana:

—Kiki ĩtanoro takanapakari, āto sito itaka inakari, maerekati ikaminaro ĩtanoro. <sup>12</sup>Iua atokokana sito ōtaniri takanapakaro, āti ōtanirita inakaro maerekati okaminiri ōtaniri —itxa Xesosi.

### **Xesosimoni Amarini Apokini**

*(Mateo 19.13-15; Arókasi 18.15-17)*

<sup>13</sup>Iposo atoko ātikaka kākiti anikari amarini Xesosimoni. Inirekarina Xesosi misākiretiniri Teoso ninoa amarini ĩkapani. Txamari imoianariakori txitana. !Auiritana amarini anikinina Xesosimoni.

<sup>14</sup>Xesosi ikara ikenakotakasaaki, !apokaerekatari. Ininiã iua:

—Hāuiritariko amarini notamoni apokini. !Hĩotokakapiri, kotxi kākiti Teoso auĩtetakani amarini atoko itxauana. <sup>15</sup>Ia atāo: Kākiti mapakapakaniāri Teoso, amarini apakapiniri atoko iminakaniã, kona isa Teoso auĩtetxi ininiãtaãua —itxa Xesosi.

<sup>16</sup>Ininiã Xesosi kataratari amarini. Itakari iuako ikiina nopini. Amanaāri Teoso erekari itakini amarinimoni.

### **Ātokori Ito Txineiroteri**

*(Mateo 19.16-30; Arókasi 18.18-30)*

<sup>17</sup>Xesosi iuaĩkana potorika. Iuasaaki ātokori miteka iuamoni. Ikapotoreĕkaua Xesosi apisatoō.

—Koerekareri erekari, kiripa nikama Teosokata ātipirika nauini ĩkapani? —itxa.

<sup>18</sup>Ininiã Xesosi:



—Kininiāpa “erekari” pitxano? Teosonanira erekari. <sup>19</sup>Pite imarotari Teoso paniātakiti. !Pokaniuatape. !Pisirīkape āti ūtanorokata. !Pīitiriuatape. Poxiene !pikamape. Apanakini !pimisirienetape. Piri, pinoro pakini pipaxitako —itxa Xesosi.

<sup>20</sup>Iua ātokori txari:

—Noereēkiri, axapitipanikara ninakasaaki, nikīpitari ikara Teoso paniātakiti —itxari.

<sup>21</sup>Ininiā Xesosi apokaerekatari iua.

—Auapanika ātinoka pikamini tīkane. Pisa. Tiitxi ikinika pinakiti pivētxitako. Txineiro papakapakito pisikako matxineirotenimoni. Eereka pimoianatanoko nota. Ikara atoko inakari pikaminiā, Teoso tixine papokasaaki ikinipoko erekari auiniiko pite —itxari iua.

<sup>22</sup>Ikara Xesosi sākire ikenakotakasaaki, imatinaniuata. Isipe. Maerekaxiniretinoka itxa, kotxi kaiāori itii.

<sup>23</sup>Xesosi sapotorika, misākireta itxana imoianariakori:

—Pamimapaniri katxineiroteri sini Teoso auītetxi ininiātaāua —itxa.

<sup>24</sup>Imoianariakori:

—Anekani? —itxana.

Iuaīkana Xesosi txari:

—Pamimapaniri katxineiroteri sini Teoso auītetxi ininiātaāua.

<sup>25</sup>Atauako kamero napatari ākorike sonakiā? Apia mimari kākiti katxineiroterini auītetiniri Teoso —itxana.

<sup>26</sup>Imoianariakori iteene tsorīkaānāta.

—Ininiā kipa sari Teoso auītetxi ininiātaāua? —itxana imoianariakori.

<sup>27</sup>Ininiā Xesosi apakapapiretana:

—Teoso posotari ikinipoko ikamini. Kākiti !liposotari. Teoso posotari anikiniri katxineiroteri itixinemoni —itxa.

<sup>28</sup>Petro txari:

—Ate takanapapekari ikinipoko pite amoianatini īkapani —itxari Xesosi.

<sup>29</sup>Ininiā Xesosi:

—Atāo nitxai. Paapoko pitakanapiniā, pitariakori, pitaroakoro, piri, pinoro, pītanoro, pamariteni, pikikiote, pitakanapiniā notakata pisini īkapani, Teoso iokanapirena erekari pisāpiretini īkapani,

<sup>30</sup>pitakanapakiti iua apiata nisikaiko. Īkorsaaki nisikaiko itomaneri aapokotxi, itomaneri pitariakori, itomanero pitaroakoro, itomanero pinoroakoro, itomaneri pamariteni, itomaneri pikikiote, nisikaiko. Txamari iusaaki patatsiitari pimisiritiko. Iuaritika eereka Teosokata

pauapika ātipirika. <sup>31</sup>Uatxa apiari inakari, iusaakiko minakati itxauako. Uatxa minakati inakari, iusaakiko apiari itxauako —itxa Xesosi sākire.

### Iuaĩkana Xesosi Sāpiretari Ipinini

*(Mateo 20.17-19; Arókasi 18.31-34)*

<sup>32</sup>Xesosi imoianariakorikata Xerosareẽ kimaporite iāpotakasaakina, Xesosi ĩkiika. Iusaaki ninoa maerekaxiniretinoka itxana. Apanakini ninoa tikini sikani pĩkarauata. Ininiã Xesosi iotoka. Akiritana imoianariakori tosi pakini. Isāpiretana paĩtiki kākiti kamakiti iuamoni tĩkane. <sup>33</sup>Ininiã iua:

—Hikenakota. Xerosareẽmoni asa uatxa. Iuaã nota hĩtari iaxitikiri sikaākako sasetotxi auĩteakorimoni, kaiōkatsopareriakorimoni pakini. Ninoa paniātariko nota okiko. Iposo atoko Xoteo minakonimoni sika ninaākako. <sup>34</sup>Inapetanonako. Inoropatanonako aāpitsaã. Ikiisokanonako. Iposo atoko oka ninaākako. Ipi āti pakini ōti inakasaaki iuaĩkana nōkitikauako — itxa imoianariakorimoni.

### Txiako Xoão Pakini Amanaākiti

*(Mateo 20.20-28)*

<sup>35</sup>Iposo atoko Txiako, Xoão pakini sari Xesosimoni. Ninoa Sepeteo anaakori.

—Koerekareri, ate nirekari aamanaākiti pikamini —itxana.

<sup>36</sup>Ininiã Xesosi pimaãna:

—Kipa hinireka nikaminii hĩte? —itxana.

<sup>37</sup>—Pite ikinimane auĩte pinakasaakiua, pauiritaua pitekata aĩtopākini, pikikomoni, pisaneremoni aĩtopākini —itxana.

<sup>38</sup>Ininiã Xesosi:

—!Himarotari hamanaākiti, kotxi mapaõti napa atoko nota apakapariko iātatxi tsiĩtxiã niātini ĩkapani. Hĩposotatari ikara hiātini? Nipatxisataākako tsiĩtxiã. Hĩposotatari ikara atoko hĩpatxisatiko?

<sup>39</sup>—Aposotapitika —itxana ninoa.

Xesosi txana ninoa:

—Inipitikara hiātariko nota iātakiti. Inipitikara hĩpatxisataākako nota patxisatiko atokokana. <sup>40</sup>Txamari !niposotari nauiritinii hĩte nikikomoni, nisanaremoni hiĩtopākini, kotxi Teoso mereẽpekana kākiti nikikomoni, nisanaremoni topākakani tĩkane —itxa Xesosi.

<sup>41</sup>Xesosi moianariakori tesi pakini kenakopiretakasaakiri Txiako, Xoão pakini amanaãkiti, ininiã ninoa omanatana. <sup>42</sup>Ininiã Xesosi akirita txana imoianariakori:

—Uaimoni hina. Hiitopãka notakata —itxana ninoa.

—Híte imarotari Xoteo minakanua auíteakori pataparana. Ninoa auiritari kãkiti kaminiri ninoa paniãtakitinoka. <sup>43</sup>Ninoa atoko !hĩtxape. Apiari pininiua pinirekiniã, pimoianatana apanakini.

<sup>44</sup>Apanakini auíte pininiã pinirekiniã, nitiritxi pitxauako merepanika. <sup>45</sup>Ikara atoko nitxa nota hĩtari iaxitikiri ïkorapokoriti napokasaaki. Ninitiri !auari. ïkorapokoriti napoka, kãkiti nitiri nininiua ïkapani, kãkiti nitiretini ïkapani. ïkorapokoriti napoka nipinini ïkapani, kaiãopokori kãkiti mapinakani ïkapani, kotxi nota ïkitxirauata ninoa mapinakani ïkapani —itxa Xesosi.

### Mõsiãreti Patximeo Inakori

(Mateo 20.29-34; Arókasi 18.35-43)

<sup>46</sup>Xesosi imoianariakorikata apoka Xerikoo sitatxiti. Eereka ipotorikasaaki imoianariakorikata itomaneri kãkitikata, iusaaki mõsiãreti Patximeo inakori kimapori ïtiniãpo iitopãkanãta. Tximeo inakori ãkiri iua. Iua mõsiãreti amanaãnãtaro txineiro. <sup>47</sup>Iua kenakotari Xesosi Nasareekiri inapaenetini, ininiã akirinãta:

—Xesosi, Taviini apika mekanirii, piamonĩkanoko —itxa.

<sup>48</sup>Ininiã apanakini kãkiti pinitari:

—Maãtako. !Pakirinãtape —itxarina mõsiãreti.

Iuaritika apiata akirinankata:

—Taviini apika mekani. Piamonĩkanoko nota —itxanãta.

<sup>49</sup>Ininiã Xesosi iotoka itxa.

—Hãkiritari iua mõsiãreti —itxa.

Ininiã ninoa:

—Pipoxokoniuatoko. Põkitikaua. Akiritapekai —itxarina iua mõsiãreti.

<sup>50</sup>Ininiã Patximeo okanapari imãka inopini auakari. Pakoteri õkitikaua, sa itxa Xesosi akiritiniri manapi.

<sup>51</sup>Ininiã Xesosi:

—Kipa pinireka nota kaminii pite? —itxari.

—Apiananiri, nõsiãrera ninireka —itxari.

<sup>52</sup>Ininiã Xesosi:

—Pisa. Erekapekai, kotxi pite auikari niposotiire —itxari.

Iuusaakipeka Patximeo kōsiärepeka itxa. Xesosikata sa itxa kimaporiã.

### Xesosi Xerosareë Apokaãpotini

(Mateo 21.1-11; Arókasi 19.28-40; Xoão 12.12-19)

**11** <sup>1</sup>Xesosi imoianariakorikata imatokoãpotari Xerosareë. Ōtanoxiratarari, oriva mina takikoãtaã takote apokana. Iuaã aua aapokotxi Petxipaxee inakori, Petánia inakori apaka. Iuaã Xesosi iokanatanana ipi imoianariakori.

<sup>2</sup>—Hĩsa ikiraã kaixiti auakari aapokotxiã. Iuaã hãpokasaaki, hãpokari xomëta ãkiri iaxiriãkori. Kãkiti !iitopãkapanika iua nopini. Hĩkoxirikari. Uaimoni mina hĩtxari. <sup>3</sup>Kãkiti pimaãkasaakii hĩte: “Kinirepa hĩkoxirikatarari xomëta ãkiri?” hinikosaakiko: “Apiananiri nirekari iua. Iuaĩkana akamoni aminariko,” hĩtxako.

<sup>4</sup>Ininiã eereka isana. Apokarina iua xomëta ãkiri iaxiriãkori kimaporiã aapokotxi tore takote. Ininiã ikoxirikarina. <sup>5</sup>Ãtikaka kãkiti iuaã auakani:

—Kinirepa hĩkoxirikatarari xomëta ãkiri? —itxana Xesosi moianariakorimoni.

<sup>6</sup>Ininiã Xesosi paniãtini iaõka apakapapiretana. Ininiã kãkiti iuaã auakani:

—Ininiã hanikaikari —itxana.

<sup>7</sup>Ninoa anikari xomëta ãkiri Xesosimoni. Ininiã imãkana ãti imãkana nopini auakari itakarina xomëta ãkiri nopini Xesosi topãkini ĩkapani. <sup>8</sup>Apanakini kãkiti matameëkari imãkana ãti imãkana nopini auakari kimaporiã Xesosi napini tĩkane. Apanakinipekana sauakari aãxike. Kimaporiã itakaãpotarina.

<sup>9</sup>Ninoa Xesosi tikini ĩkani, iua apisa sikani pakini akiriãpokatanana ipoxokoniritikana imakinikana:

—Peerekari Teoso, Apiananiri. Iua iokanatai pite atemoni. Anirekari erekari isikinii pite. <sup>10</sup>Peerekari Teoso, aãtokirini Tavii aãũite ininiua atokokana iuaĩkana apoka. Peerekari Teoso, iaxiti apiko nopinixiti auakari. Apiananiri itxaua —itxaãpokatanana.

<sup>11</sup>Xesosi apoka Xerosareë. Teoso misãkiretiko aikotimoni isa. Iuaã ĩroã itxa. Ikinika iroko ãki itikapokota. Iua atoko mapiãpe, ininiã isari Petánia aapokotxitimoni tosi imoianariakorikata.

### Piko Mina Marito Pirena

(Mateo 21.18-19)

<sup>12</sup>Ikatimatakasaaki ipotorikana Petánia. Iusaaki Xesosi natxita. <sup>13</sup>Ikira atoko atamataro piko mina. Ito otsopa aua. Isari oamoni kariro iuākatiniāro, kotxi piko mina tsopa auakasaaki, ori auapitika. Txamari apokasaaki, otsopanani auari, kotxi kona ori manapini. <sup>14</sup>Ininiā Xesosi: —Kākiti !itximaikaiko piri —itxari piko mina. Imoianariakori kenakotari isākire.

### Pirātxi Vētxitakani Omitikiko

(Mateo 21.12-17; 20-22; Arókasi 19.45-48; Xoão 2.13-22)

<sup>15</sup>Xesosi imoianariakorikata apoka Xerosareē. Xesosi iroã Teoso misākiretiko aikotiā. Omitikana kākiti iuaātaā amotiitakani, sikatiitakani. Ikapakitikari amesa ninoa txineiro apakapakani amesane. Ikapakitikari kamoā vētxitakani topākini apaka. <sup>16</sup>Iua !auritana kākiti anikiniri tiitxi aiko ipirikoatinina. <sup>17</sup>Xesosi oerekana kākiti iuaā auakani:

—Teoso sākire iōkatsopatakori txari:

Ia naapoko. “Teoso misākiretiko aikoti” akiritaākako, ikini itixiti auakani misākiretinino iġapani, itxa. Txamari hīte txīkitakari ia aiko kiītiririni iomaātiniātaā ininiua —itxa Xesosi.

<sup>18</sup>Sasetotxi auīteakori, kaiōkatsoparerini pakini kenakotari Xesosi sākire. Ininiā ninoa tsoriġkaāta. Ixinikaxititana.

—Kanatokopa atxatari Xesosi aōkini? —itxanātana.

Ikinimane iteene apokaerekatari Xesosi sākire, ininiākara sasetotxi auīteakori, kaiōkatsoparerini pakini pīkari Xesosi.

<sup>19</sup>Ipiākapokotapeka Xesosi takanapari sitatxi imoianariakorikata.

<sup>20</sup>Katimatiniġkata kimaporiā isaāpotakasaakina, atamatarona oa piko mina. Opīpe. Okotsapekara ipinakepeta apaka. <sup>21</sup>Petro xinikari iua apisapanika Xesosi sākire, ininiā akiritari Xesosi:

—Koerekareri, patamataro piko mina. “Kākiti !itximaikaiko piri,” pinakito. Oa piko mina ipīpeka —itxari.

<sup>22</sup>Ininiā Xesosi:

—Pauikapiretariko Teoso sākire. <sup>23</sup>Atāoenekara nisāpiretai.

Pauikiniāri Teoso sākire, piposotari pipaniātiniġri ikira ōtanoxiratari: “Pōkitikaua. Pokakataua potxoari uinitimoni.” Pākixinireē iteene

pauikiniári pisākire iaōka apokini, ininiā apokapitikako pamanaākiti. <sup>24</sup>Ikara atoko ininiā nota txai hīte, Teoso pimisākiretakasaaki, pamanaākasaakiri pinirekakiti, pauikariko iposope Teoso sikinii, ininiā papakapapanikariko. <sup>25</sup>Teoso pimisākiretakasaaki, āti pomanatiniā, pitakanapariko pomanākare. Pimaxinīkaretiniári maerekati ikaminii, ininiā piri iaxitikiri maxinīkaretari maerekati pite kamakiti. <sup>26</sup>Pimamaxinīkaretakaniári maerekati āti kamakiti pitemoni, ininiā piri iaxitikiri kona maxinīkaretari maerekati pite kamakiti apaka.

### **Xesosi Paniātakari Moerekakoni**

*(Mateo 21.23-27; Arókasi 20.1-8)*

<sup>27</sup>Iuaīkana apokana Xerosareē. Xesosi tīpokota aiko Teoso misākiretiko pirikere āki tinikata. Itīpokonātakasaaki, sasetotxi auīteakori, kaiōkatsoparerini, kiomātxiakori pakini apoka iuamoni. <sup>28</sup>Ininiā ninoa txari:

—Kipaniāpa pikamari īkora pikamakiti? Kipa paniātai? — itxarina Xesosi.

<sup>29</sup>Ininiā Xesosi apakapapiretana:

—Nota apaka pimarauatako hītemoni. Ātinoka nipimaāiko hīte. Hīsāpiretiniāno, nota sāpiretai hīte niokanatakiri uāka apaka.

<sup>30</sup>Kipa paniātari Xoōni ipatxisarauatini? Teosokani paniātari Xoōo? Kākitikani paniātari Xoōo? Hīsāpiretano —itxana.

<sup>31</sup>Ininiā ninoa xinikaxitināta. Imisākiretakakana. Ipimaākakana:

—Natokopa itxa aāpakapapiretiniri iua? Aāpakapapiretiniári: “Teoso paniātari iua,” ininiā iua: “Kinirepa kona hāuikatari iuani sākire?” itxapemaua. <sup>32</sup>Aāpakapapiretiniári: “Kākiti paniātari iua,” ikinimane omanataua —itxanātana.

Ninoa pīkari kākiti kotxi ikinimane auikari Xoōoni atāo Teoso sākire sāpiretakari ininiua. <sup>33</sup>Ikara atoko ininiā ninoa apakapapiretari Xesosi:

—Ate !imarotari.

Ininiā Xesosi:

—Ikara atoko ininiā, nota !nisāpiretai hīte nipaniātakiri uāka.

### **Parīkauatakani Maerekani**

*(Mateo 21.33-46; Arókasi 20.9-19)*

**12** <sup>1</sup>Eereka Xesosi sāpiretana ninoa sāpirenatxi atāo inakari oerekiko. Itxari:

—Kiki takarauata. Txipokori ova inakoronoka itaka. Ipiriketari. Ikamari ova maōkiko. Iposo atoko itakare apanīkakixitika ikamari aapokotxi axapitiri ōtanori ikikiote imakinetini īkapani. Iposo atoko ipaniātana ātikaka kikiakori itakare inīkatinina īkapani, kotxi iua sariko ōtakoxiti. Ninoa apakapamaroko ipixini ova iparīkana īki. Iposo atoko katakareri sipe. <sup>2</sup>Ova manapi, iua katakareri iokanitari initiri ninoa kikiakorimoni ova ipixini apakapini īkapani. <sup>3</sup>Txamari iua apokasaaki ninoa maīkari iua. Ixirokittarina. “Pisipeka,” itxarina. Miketika ikanapiripe.

<sup>4</sup>—Iuaīkana katakareri iokanitari āti initiri ninoamonikana. Txamari ninoa kikiakori misiritari iua. Kai soroā ikiporonakarina, karota itxapirina ikiiā. <sup>5</sup>Iuaīkana katakareri iokanitari āti ninoamonikana, txamari ninoa okapiri iuani. Kaiāopokori initiriakori iokanata ninoamoni. Apanakini inoropatana. Apanakini okana. Itxaāpotana.

<sup>6</sup>—Iua katakareri auapanika ātinoka iokanatinini īkapani, imi iteene itiretakiti. Imapotōkire iokanitari imi ninoamonikana. “Notamoni ninoa paxitariko namarite” itxa. Ininiā imi apoka ninoamoni. <sup>7</sup>“Katakareri ākiri napani. Maōkari. Aōkiniāri, itakare imakinika kaikotinaua ate,” itxakakana kikiakori.

<sup>8</sup>—Ininiā ninoa maīkari katakareri ākiri, oka itxapirina, kikio xiripire oka itxarina iūto.

<sup>9</sup>—Ininiā kiripa ikama katakareri? —itxa Xesosi.

—Iua kanapiriā. Okanako ninoa kikiakori. Ipaniātana apanakini itakare imakinetinina īkapani —itxa Xesosi.

<sup>10</sup>Hīte atatsopatapekari ia Teoso sākire iōkatsopatakori:

Aapokotxi kamakani kona nirekari ātika kai soro. Iua kai imanirekakiniti kai apiari itxapekaua. Apanakini kai soro maīkakari itxaua.

<sup>11</sup>Teosokara txīkitakari ikara atoko inini. Ikara peerekari atemoni, itxa Teoso sākire iōkatsopatakori.

<sup>12</sup>Xoteo auīteakori imarotarina Xesosi sākire. Ninoa imarotari ikamakitina takari makinetakani kamakiti atokokana, ininiā ninoa omanākarauata Xesosi sāpiretakiti xika. Ninoa kinirāo maīkaka itxarina Xesosi, txamari !imaīkarina iua, kotxi ipīkarina kākiti. Ininiā itakanaparina Xesosi, sipe itxana.

### Homano Auĩte Īkitxitiko

(Mateo 22.15-22; Arókasi 20.19-26)

<sup>13</sup>Eereka Xoteo auĩteakori iokanatana ātikaka Erotxi sākire auĩākani, ātikaka pariseoakori pakini Xesosimoni. Inirekarina Xesosi kerokiniri isākire, kotxi ninoa nirekari Xesosi kaminiri maerekati imaĩkinirina ĩkapani. <sup>14</sup>Ninoa apokasaaki, imisākiretarina Xesosi:

—Koerekareri, ate imarotari pite sākire atāonani ininiāua. Poerekari atāonani Teoso nireēkiti kākiti kamini ĩkapani. !Pipĩkari kākiti. Kākiti poiāori pimisākiretini atokokana kākiti apiari pimisākireta apaka. Ikara atoko ininiā, pisāpiretaua. Atāokani txineiro asikini Homanoakori auĩtemoni, Sesa inakorimoni? <sup>15</sup>Atāokani asikiniri iuamoni? Apakata amasikakaniri iuamoni? —itxana.

Xesosi imarotari isākirena. Imarotari ninoa pimarauatini isākire ikerokini ĩkapani. !Inirekarina atāo inakari imarotinina. Ininiā Xesosi txana ninoa:

—Kinirepa hātamakaerekatano nota? Himinaro txineirota. Ninirekari natamatiniro —itxa.

<sup>16</sup>Ininiā iminarona.

—Kisanōkapa ia? Kiuākapa aua uai? —itxana.

Ininiā ninoa:

—Sesa sanōka, iuāka pakini —itxana.

<sup>17</sup>Ininiā Xesosi:

—Ikara atoko ininiā, hīsikariko Sesamoni iua nakiti. Hīsikariko Teosomoni iua nakiti —itxana.

Ininiā kasākirena ninoa, kotxi peerekari Xesosi apakapapiretakiti.

### Ipĩkari Ōkitikiniua Mauikakoni

(Mateo 22.23-33; Arókasi 20.27-40)

<sup>18</sup>Kikiakori satoseo inakoni, !auikari kākiti ipĩkaripeka iuaĩkana ōkitikiniua iuaĩkana auāki inini ĩkapani. Ninoa satoseo apoka Xesosimoni.

<sup>19</sup>—Koerekareri, Moisesini iōkatsopataru ia ipaniātakiti: “Kiki meenetipanika ipininiā, iua itari takaroko tikinitakoro. Iua itari keene ininiā, itakauākatari amarini iua itarini ipĩpekarini uāka,” itxa Moisesi. <sup>20</sup>Setxi itaritxiakori aua ĩkorapokoriti. Apia kiomanetakari takaro sito. Txamari ipĩkasaaki meenetopanika itikinitaro. <sup>21</sup>Ininiā āti itari takaro oakana. Ipĩkasaaki !keenepanikaro oa. Iua atokokana



itxape ãti itari. <sup>22</sup>Ininiã imakinikana ninoa takapiimaro oa. Ikinikana ninoa meenenipanika ipïpena. Eereka oanipekana apaka opïpe. <sup>23</sup>Ipïkani ôkitikasaakiua, kiriïtanoropa otxatauako? Kotxi ikinikana setxi takapekaro oa —itxana.

<sup>24</sup>Ininiã Xesosi:

—Hïte kerokari, kotxi !himarotari Teoso sãkire iôkatsopatakori. Teoso posotiire apaka !himarota. <sup>25</sup>Ipïkani iuaïkana ôkitikasaakiua, Teoso nitiriakori iaxitikini atoko itxapekauana. !ïtanorouataikako. <sup>26</sup>Hïte !auikari ipïkani ôkitikiniua. Hïte atatsopatapekari Moisesi iôkatsopatakiti aanaia tirinakari pirena. Iuasaaki Teoso misãkiretari Moisesi: “Apraõ, Isaki, Xakoo pakini Teosonekarano nota,” itxari Moisesimoni. <sup>27</sup>Ikara atoko ininiã Apraõ, Isaki, Xakoo pakini ôkitikapekua iuaïkana, kotxi auãki inakani Teosonera iua. Kona ipïkani Teosoneni itxaua Teoso. Amananini hïkerokari —itxa Xesosi satoseoakorimoni.

### Teoso Paniãtakiti Apiari Akamini

(Mateo 22.34-40)

<sup>28</sup>Iuaãtaã aua kaiôkatsoparereri. Ikenakotana ninoa misãkiretakiniua. Ikenakotari Xesosi apakapapiretakiti erekari ene. Ininiã iua pimaãri Xesosi:

—Ïkiripa Teoso paniãtakiti apiari txataua? Kipa apiaerekata Teoso nireëkiti akamini?

<sup>29</sup>Xesosi apakapapiretari:

—Teoso paniãtakiti apiari ia: “Isaero tïpa auakani, hïkenakota. Ateosone Apiananiri iua. Iuananira Teoso txaua. <sup>30</sup>Pitiretariko Apiananiri piTeosone, ikinipoko pinireëkitiã, ikini pãkixinireë, ikinipoko pixinikakitiã, ikini pitaparaxinireë pakini.” <sup>31</sup>Åtipekana Teoso paniãtakiti apiari ia: “Piteka pitiretiniãua atokotxikana, pitiretariko ãti.” Iuananira Teoso paniãtakiti ipi apiari txaua —itxa Xesosi.

<sup>32</sup>Ininiã iua kaiôkatsoparereri apakapapiretari Xesosi:

—Inipitikara pisãkire, koerekareri. !Auari ãti Teoso. Iuanokara auari. <sup>33</sup>Ininiã atiretamariko Teoso ikinipoko anireëkitiã, ikinipoko axinikakitiã, ikini ataparaxinireë. Atiretamanako apanakini aïtoka atiretini atokokana. Ikara Teoso paniãtakiti ipi apiari txaua. Teoso paniãtakiti pirãtxi aïkini iua ïkapani poiãori —itxa Xesosimoni.

<sup>34</sup>Xesosi kenakotakasaakiri isãkire ereka inini, itxari iua:

—Pite auïtearitari Teoso.

Iposo atoko apanakini !kataparaxinireika apikomoni ipimainirina.

### **Teoso Mereëkiti Tavii Apika Mekaniri**

*(Mateo 22.41-46; Arókasi 20.41-44)*

<sup>35</sup>Xesosi Teoso misäkiretiko aikoti oerekaruanätakasaaki, ipimaãri: —Kinirepa kaiökatsoparerini säkire: “Tavii apika mekanirako Teoso mereëkiti txauako?” itxana. <sup>36</sup>Erekari Matamatakoti kamasäpirenatakari Tavii:

Apiananiri misäkiretari niauïte: “Nota kikomoni piitopäkiniritika nixipokariko pimokaiakariakori. Nikamariko ninoa pikiti pitakiniätaã atoko ininiua,” Apiananiri txari niauïte, itxa Taviini. <sup>37</sup>Tavii akiritari iua Teoso mereëkiti “Niauïte.” Ikara atoko ininiã, natokopa itxa iua Tavii apika mekani ininiua? —itxa Xesosi.

Iuasaaki ikinimane kãkiti iuaã apitiitakaniua potxitari Xesosi säkire.

### **Kaiökatsoparerini Maerekani Pirena**

*(Mateo 23.1-36; Arókasi 20.45-47)*

<sup>38</sup>Xesosi oerekaruanätakasaaki, õtäkikana kãkiti:

—Kaiökatsoparerini moianari !hïtxapeua. Ninoa potxitari mäkatxi ereri ieretakinina kãkiti apisatoõ inapinina ïkapani, kãkiti atamatinina ïkapani. Ninoa apokaerekatari imisäkiretikona ipaxitikona nipokori sikikoãtaã inapaãpotakasaakina. <sup>39</sup>Ninoa potxitari kãkiti topãkini apiaerekatakari nopini iitopãkinina aiko Xoteo apotiitiniãtaãua. Kiiniriã ninoa potxitari kakiiniriteri topãkinimoni iitopãkinina. <sup>40</sup>Ninoa mixirikari tikinitakoni aapoko, iuaritika okanani imisäkiretarina Teoso kãkiti apisatoõ, ininiã kãkiti uãkatari ninoa erekarini atoko ininiãuana. Teoso iteene misiritanako kãkiti ikara atoko inakani.

### **Tikinitakoro Matxineiroteto Sikakito**

*(Arókasi 21.1-4)*

<sup>41</sup>Xesosi topãka txineiro Teoso ïkapani apakapikoãtaã. Xesosi itikari kãkiti ieretakiniro txineiro kaixa ãki. Itori katxineiroterini okaro txineiro mirikinito kaixa ãki. <sup>42</sup>Eereka tikinitakoro matxineiroteto apoka iuaã. Otakaro ipi txineiro otaki kaixa ãki. Poiãonoka txineiro. <sup>43</sup>Ininiã Xesosi akiritana imoianariakori.

—Inipitikara nisäpiretai hïte. Õkora tikinitakoro matxineiroteto sikakito apiata. Apanakini sikakito poiãoka. <sup>44</sup>Kotxi ninoa sikaro

txineiro itetakoro. Oa matxineiro teto sikari okinika onakito —itxa Xesosi.

### Teoso Misākiretiko Aikoti Irikiko

(Mateo 24.1-2; Arókasi 21.5-6)

**13** <sup>1</sup>Teoso misākiretiko aikoti Xesosi pokĩkasaaki, imoianari misākiretari iua:

—Koerekareri, patamata ia kai aapokotxiti itomaneri. Amaripokori. Ia aiko Teoso misākiretiko peerekari.

<sup>2</sup>Ininiã Xesosi:

—Hãtamatarari ia aiko mitari. ãti õti imakinika irikaãkako. Kona kai kaikotaikako ãti kai nopini —itxa Xesosi.

### Misirikaretxi Apokaenetini

(Mateo 24.3-14; Arókasi 21.7-19)

<sup>3</sup>Xesosi topãka oxiratari nopini Teoso misākiretiko aikoti apisatoõ. Iuaã aua oriva minanape. Iuasaaki Petro, Txiako, Xoã, ãtree pakini apoka iuamoni. Ninoanoka aua iuaã. <sup>4</sup>Ipimaãrina Xesosi:

—Kirisaakipa aiko Teoso misākiretiko irikaãka? Natokopa itxa aimarotini ikara õti apisapanika?

<sup>5</sup>Ininiã Xesosi:

—Erepaniko. !Hãuiritapiri apanakini misirienetini hĩte. <sup>6</sup>Itoipaniriko kãkiti, “Xesosikarano,” inakanipaniko. Ninoa misirienetari kaiãopokori kãkiti. <sup>7</sup>Neenamatzhi hĩkenakoenetakasaaki, neenamatzhi ene hĩkenakoenetakasaaki, !hĩpĩkarauatape. Ikara auapitikako, iuaritika kona xipokatxi õtipanikani. <sup>8</sup>ãti uãka neenamauata ãti uãkakata. ãti tixini auakani neenamauatako ãti tixini auakanikata. ãtikaka itixi iakeẽkatakako. Kaiãopokopaniri natxi. Amarini auini tsi atoko itxapaniko.

<sup>9</sup>—Erepaniko hĩte. Himaĩkaãkako, auĩtetximoni hĩsiãkako. Hinoropataãkako aãpitsaã aiko ãki Xoteo apotiitiniãtaãua. Nota sãkire hãuikini xika hĩte anikaãkako poiãori auĩtetximoni. Apiari auĩtetximoni apaka hanikaãkako. Iuasaaki hĩte sãpiretanako ninoa Teoso iokanapirena erekari. <sup>10</sup>Itixi xipokini apisapanika Teoso iokanapirena erekari sãpiretaãkako ikinimanemoni ikini itixitikinimoni. <sup>11</sup>Kãkiti maĩkasaakii hĩte, anikasaakii hĩte auĩtetxiakorimoni, !hĩxinikapiri hĩsãkire tĩkane hĩsãkirauatini apisapanika. Hĩsãkirauatakasaaki, iuasaakipeka himarotari hĩsãkire. Erekari Matamatakoti txĩkitakai iuasaaki hĩsãkire himarotini.

12Kākiti sikanapariko atão itariakori auĩtetximoni okiko tĩkane. Iriakoritxi sikanapanako imiakori auĩtetximoni okiko tĩkane. Eenetxiakori omanatana iriakori, inoroakoro pakini. Eenetxiakori xika ninoa okapeẽka. 13Nota sãkire hãuikini xika, ikinimane omanatai hĩte, iuaritika himatakanapakaniãri nisãkire hãuikini, hanikaãkako Teoso tixinemoni —itxa Xesosi imoianariakorimoni.

### Iteene Maerekanitxi Apokini

(Mateo 24.15-28; Arókasi 21.20-24)

14Iuaĩkana Xesosi sãpiretana:

—Hĩtikariko Maerekati Apiatakari Teoso misãkiretiko aikoti ãki. Kitxakapirĩka Teoso sãkire sãpiretakari Tanieo inakori sãpiretapekari ikara pirena. (Ininiã hĩte ia atatsopanãtakanii, hĩkenakotariko Xesosi õtãkikiniua.) Maerekati Apiatakari Teoso misãkiretiko aikoti ãki hĩtikasaaki, hĩte Xotẽia tõpa auakanii, himitekapoka mitaxiratarimoni. 15Iusaaki hĩte haãpoko nopini auakanii, katima hĩtxako hĩkatxakini. Haãpoko !hĩiroãpe hĩtii himakatzakini ĩkapani. 16Hĩte kikio auakanii, !hĩkanapiripe haãpokomoni himãka hãpini ĩkapani. 17Ikarasaaki !erekapaniri sito kamixiromoni, sito kaxitakakareromoni. 18Teoso hamanaã himitekini kamoĩsaaki, kotxi himitekini mitaãsaaki !erekari. 19Iusaaki atatsiiri auakatapitikako. Ia atatsiiri apiata atatsiitaãkako. Kitxakapirĩka itixi Teoso kamakasaaki kãkiti atatsiirauata poiãoka. Ikara atatsiiri õti apisa kãkiti atatsiirauata poiãoka. Ikara atatsiiri õti napa atoko !ikara atoko inakari atatsiiri !auaikako. 20Teoso mapoiãotakaniãri iua õti kãkiti atatsiirauatini õti, !auaikamako kãkiti. Ikinipekamako ipĩpemanako. Teoso iotokakariko ĩkora atatsiiretxi, imereẽkini mapinakanii ĩkapani.

21—Apanakini sãpiretiniãi hĩte: “Xesosi Teoso mereẽkiti ia,” hinikosaaki, !hãuikapiri. “Xesosi Teoso mereẽkiti ikiraãtaã,” hinikosaaki, !hãuikapiri. 22Kotxi Teoso mereẽkiti minakaniiua apokapitikako, “Xesosikarano nota,” inakari. Apaka apanakini apokapitikako, “Teoso sãkire sãpiretakarikarano nota,” inakari. Paxirari ninoa sãkire. Kãkiti ikara atoko inakanii kamariko posotiiiretxi, kãkiti itikiniri ĩkapani. Ninoa nirekamari Teoso mereẽkini imisirienetinina. 23Erepaniko. Ikara õti apokini apisapanika nõtãkikai hĩte —itxa Xesosi imoianariakorimoni.

### **Kākiti Itari Iaxitikiri Kanapiriini**

*(Mateo 24.29-31; Arókasi 21.25-28)*

<sup>24</sup>—Iua misirikaretxi napa atoko atokatxi iuakapeka. Kasiri liponikaika. <sup>25</sup>Iōriki iaxitikero irikako. Ikinipoko kaikori iaxiti auakari ioĩketaākako. <sup>26</sup>Iuasaakipekako ikinimane atapariko kākiti itari iaxitikiri apokaāpotini katxiāri āki. Itapararitika apoka. Kaiotximereri itxaua iusaaki. <sup>27</sup>Iusaaki iokanatana initiriakori iaxitikini itinixitimoni, ipinimoni itinixitimoni, atokatxi pokĩkinimoni, atokatxi ereēkokinimoni. Iokanatana initiriakori ikini itixitimoni kākiti imereēkini apitiitinina ikapani —itxa Xesosi imoianariakorimoni.

### **Piko Mina Pirena**

*(Mateo 24.32-35; Arókasi 21.29-33)*

<sup>28</sup>Iuaĩkana Xesosi sākirauata.

—Nisāpiretai sāpirenatxi atāo inakari oerekiko, piko mina pirena, nikanapiriini apiata himarotini ikapani. Pooĩoporipeka onakasaaki, otomorekasaaki, “Kamoĩ apokanapanoka,” hĩtxa. <sup>29</sup>Iua atokokana ikara misirikaretxi mixikanani nisāpiretakiti hĩtikasaaki, himarotapekariko nota kaiama kanapirikapeka ninini. <sup>30</sup>Ia nisākire atāo. Itixi auakani !ixipoka ikinipoko nisāpiretakiti mapokakani apisa. <sup>31</sup>Iaxiti xipokapitikako. Īkoraxiti apaka xipokapitikako. Iuaritika nota sākire lixipoka —itxa Xesosi imoianariakorimoni.

### **Kākiti !Imarotari Xesosi**

#### ***Apokini Manapi***

*(Mateo 24.36-44)*

<sup>32</sup>Iuaĩkana Xesosi sākirauata:

—Kākiti !imarotari ikara ōti manapi apokini. Teoso nitiriakori iaxitikini apaka !imarotari ikara ōti. Nota Teoso ākirikanera !imarotari ikara ōti. Nirinanira, Teosonanira, imarotari.

<sup>33</sup>Hĩtapapikariko. Hĩkoatapikako. Teoso himisākiretapikako. Kotxi !himarotari ikara ōti apokini.

<sup>34</sup>—Nikanapiriākasaaki, kiki ōtako sikari kanapiriini atoko nitxa. Iua kiki potorikasaaki, ipaniātana initiriakori aapoko inĩkatinina. Ikininape isikanapana parĩkatxi ikaminina. Ipaniātari initiri aapoko toreātaā kaikotakari, “Araōkire pitxako,” itxari. <sup>35</sup>Nota hĩtari iaxitikiri

iua kiki õtako sikari atoko nitxako. ãtipirika hiãtapapikanoko, kotxi !himarotari nota apokini õti. !Himarotari mapiãtikikauako napoka. !Himarotari apanãkanõkauako napoka. Imaropirãkatauako napoka. ãkanõkapanikauako napoka !himarotapaniri. <sup>36</sup>Atxiiti patimari napokini, ininiã hãkoatapikako, mimakatika hinini ãkapani nota apokasaaki. <sup>37</sup>Ininiã ãtipirika hiãtapapikanoko. Ikininapemoni apaka ikara nitxa —itxa Xesosi imoianariakorimoni.

### Xesosi Okaenetiko Pirena

(Mateo 26.1-5; Arókasi 22.1-2; Xoão 11.45-53)

**14** <sup>1</sup>Iuasaaki kãkiti apotiitaua ipi kiiniriti auakasaaki. Pãskoã kiiniriti, pão miãtiãkati nikiko kiiniriti pakini aua. Ipi õti kiiniri potorikini apisapanika sasetotxi auãteakori, kaiõkatsoparerini pakini xinikaxitita:  
—Natokopa atxatariko Xesosi amaãkini aõkini ãkapani?  
<sup>2</sup>!Amaãkapaniri kiinirisaaki, kotxi amaãkiniãri, kãkiti naiatamaua eereka —itxanãtana.

### Sito Kamariãro Mãkaro

(Mateo 26.6-13; Xoão 12.1-8)

<sup>3</sup>Xesosi auanãta Petãnia aapokotxiti Simão inakori aapoko. Iua Simão akiritaãka “Maere Matati.” Simão aapoko Xesosi nipokonãtakasaaki, sito apoka. Oa minari kopitipaki kai kamakori, kai arapãstiro inakoro. Kopitipaki ãki aua kamariãro, nato inakoro. Pakaronepokoro. Oãpokasaaki Xesosimoni, opakauanakari kopitipaki. Okitakaro kamariãro Xesosi kiiã. <sup>4</sup>Iuasaakipeka apanakini iuaã auakani omanãkarauata.

—Kinirepa oioanataãka kamariãro? <sup>5</sup>Ovẽtxitamaroko, ininiã kaiãopokomaniko txineiro oãpakapamako. Tresẽtosi txineiro ota prata kamakori oãpakamako. Txineiro mauakinitimoni osikiniã erekamariko —itxana.

Iteene ikapatitana. <sup>6</sup>Ininiã Xesosi:

—Ikara atoko !hãtxapero. !Homanatapero. Erekarì okaminano. <sup>7</sup>Kãkiti matxineiroteni auapikako hãtekata. Hinirekasaakiriko hãsikaro txineiro ninoamoni. Nota !auari ãtipirika hãtekata. <sup>8</sup>Oia sito kamari ikinipoko oimarotakiti nota ãkapani. Nipinini apisapanika oina notamoni. Omaritari niõto, niõto iposope inini nikatiko ãkapani. <sup>9</sup>Atão nisãpiretai hãte. Teoso iokanapirena erekari sãpiretikoãtaã

ikini itixiti, osãpiretaãkako apaka oia sito kitakiniro kamariãro nikiiã, ininiã kãkiti ikini itixiti auakani xinikapikaro oa —itxa Xesosi.

### **Xotasi Mĩkapiritiniri Xesosi**

*(Mateo 26.14-16; Arókasi 22.7-16, 21-23; Xoão 13.21-30)*

<sup>10</sup>Tosi pakini Xesosi moianariakori. Imoianari Xotasi inakori sari sasetotxi auĩteakorimoni. Imisãkiretana ninoa Xesosi imĩkapiritini ĩkapani, ninoamoni isikiniri ĩkapani. <sup>11</sup>Ikenakotakasaakirina Xotasi sãkire, ipoxokoniuatana. Isikaenatarona txineiro iuamoni. Eereka Xotasi iãtapari Xesosi imĩkapiritini õti.

### **Pãskoa Kiiniriti Kamiko**

*(Mateo 26.17-25; Arókasi 22.7-13)*

<sup>12</sup>Pãskoa kiiniriti potorikini õti, soti auĩte anaakori okiko õti, Xesosi moianariakori misãkiretari iua:

—Namonipa pinirekatari Pãskoa kiiniriti akamini?

<sup>13</sup>Ininiã Xesosi iokanatana imoianariakori ipi.

—Hĩsa sitatximoni. Iuaã kiki ãparaã kopitiã anikakari hãpiãkata. Iua kikikata hĩsa. <sup>14</sup>Iua sinimoni kaapokori himisãkireta. Hĩtxariko iua: “Koerekareri nirekari imarotiniri, namonipa erekari imoianariakorikata inipokotini Pãskoa kiiniriti ikamakasaakina?” hĩtxariko. <sup>15</sup>Ininiã iua oerekaiko hĩte itanokiri koa mitapoari. Auapeka kãkiti topãkini. Imakinika oeretapeẽkaika —itxana.

<sup>16</sup>Ininiã imoianariakori sari. Sitatxi apokasaakina Xesosi sãkire iaõka aua. Ininiã ninoa kamari nipokori Pãskoa kiiniriti ĩkapani.

<sup>17</sup>Ĩkanõkapeka inakasaaki Xesosi apoka tosi imoianariakorikata.

<sup>18</sup>Inipokonãtakasaakina, Xesosi txana:

—Atão nisãpiretai. ãti hĩte notakata nipokotakari mĩkapiritanoko nota —itxa.

<sup>19</sup>Ininiãkara Xesosi moianariakori matinaniuata. Ipimaãrina Xesosi:

—Notakani atxiĩti?

ãtipekana:

—Notakani atxiĩti?

Ininiã imakinikana ikara atoko itxana. <sup>20</sup>Ininiã Xesosi:

—ãtika hĩte notakata auakari mĩkapiritano. Notakata komiri iopitiãtakarikarako sikano nimokaiakariakorimoni. <sup>21</sup>Nota hĩtari iaxitikiri okaãkako. Teoso sãkire iõkatsopatakori sãpiretapekari

nipinini tīkane. Nota hītari iaxitikiri mīkapiritakari iteene misiritaākako. Erekarariko maponaniākatika inaākamako.

### **Xesosi Īto, Iarēka Pakini**

(Mateo 26.26-30; Arókasi 22.14-23; 1 Korīto 11.23-25)

22 Xesosi imoianariakorikata nipokonātakasaaki, Xesosi kosekari komiri. Imisākiretari Teoso:

—Erekapitikari ia komiri pisikakiti atemoni —itxari.

Imapopeēri komiri, xanaka itxari imoianariakorimoni.

—Apakapa, nika hītako. Ia niīto —itxana.

23 Iposo atoko koseka itxaro iākoanatchi. Imisākiretari Teoso:

—Erekapitikari ia iāriā pisikakiti atemoni.

Ininiā iākoanatchi isikana imoianariakori. Ikinikana iātarina iāriā.

24 Ininiā Xesosi:

—Ia niarēka xiketakariko makatxakariko kaiōpokori kākiti maerekani. Teoso sāpiretapekari kākiti ikamaenetakiti amaneri kākiti īkapani. Ia niarēka oerekari kākiti, Teoso kamapekari ikamaenetakiti. 25 Atāo nisāpiretai. !Niātaikaroko ovapeē, Teoso auītetxi ininiātaāua nimapokakanisaaki. Iuaā napokasaaki niātari. Amaneri iāriāti niātako —itxa Xesosi.

26 Eereka ninoa xikarauata Teoso īkapani. Iua atoko isana oriva mina auiniātaā, oxiratari nopini.

### **Xesosi Sāpiretari Petro**

#### ***Kipatiniri Iua***

(Mateo 26.31-35; Arókasi 22.31-34; Xoāo 13.36-38)

27 Xesosi misākiretana imoianariakori:

—Ia īkanōkati hīkinika hīte takanapanoko nota, kotxi Teoso sākire iōkatsopatakori sāpiretapekari ikara atoko inakari. Itxari:

Nokariko soti auīte piratakari, ininiā ikinika ipiraakori iarikitatako, itxa Teoso sākire iōkatsopatakori. 28 Ininiā eereka nota nipinaāka atoko, iuaīkana nōkitikaākaua atoko, nisako hīte apisa Kariréiamoni —itxa Xesosi.

29 Ininiā Petro:

—Nota !nitakanapai pite. Atxiīti ikinimane takanapai, iuaritika kona nota takanapai.

30 Ininiā Xesosi:



—Atão nisāpiretai. Ia īkanōkati patari ipikata sākirauatini apisapanikako, ipi āti pakinikata, “!Nimarotari iua,” pitxanoko — itxari Petro.

<sup>31</sup>Petro apakapapiretari itaparaxinireritika:

—Atxiīti pitekata nokaāka, iuaritika kona nota sāpiretari apanakini nimimarotakanii pite.

Ikininape Xesosi moianariakori Petro sākire iaōka ikamana.

### **Xesosi Misākiretiniri Teoso Xetsémani Inakoriātaā**

*(Mateo 26.36-46; Arókasi 22.39-46)*

<sup>32</sup>Xesosi imoianariakorikata apoka ātiātaā kākiti akiritakiti Xetsémani inakoriātaā. Iuaā Xesosi paniātana imoianariakori:

—Uai hītopāka. Teoso nimisākiretako —itxa.

<sup>33</sup>Anikari Petro, Txiako, Xoão pakini iuakata apikomoni. Iuaā Xesosi iteene matinaniuata. Maerekaxiniretinoka itxa. <sup>34</sup>Ininiā iua:

—Nixinire imaromaxiretari. Iteene nimaxire, ininiā okaaritano. Uai hīkaikota. Araōkire hītxako —itxana.

<sup>35</sup>Apikomoni isa. Ipamaka xitimoni, misākireta itxari Teoso.

<sup>36</sup>Itxari iri:

—Papai, pite posotari ikinipoko pikamini. !Pauiritapeno paītiki natatsiirauatini, iuaritika ninirekari pite nirekakiti nikamini. Nota nirekakiti nikamini kona ninireka —itxari iri.

<sup>37</sup>Eereka ikanapiriā Petro, Txiako, Xoão pakinimoni, txamari ninoa imakanāta. Xesosi akiritari Petro:

—Simão, himakanāta? Kona hīposotatari āti oaranoka hīkoatini?

<sup>38</sup>Erepaniko. Hinirekasaakiri maerekati hīkamini, !hīkamapiri.

Araōkire hītxako. Himisākiretariko Teoso, ininiā !hīkamari maerekati. Kākiti xinire atxiīti !nirekari maerekati ikamini. Txamari kākiti īto tapara poiāoka, ininiā ikamari maerekati. Ininiā erepaniko —itxana ninoa.

<sup>39</sup>Iuaīkana isa Teoso imisākiretini īkapani. Teoso imisākireta, mitxi isākire atokokana itxa. <sup>40</sup>Iposo atoko ikanapiriā. Txamari iuaīkana ninoa imakanātapanika. !Iposotarina ikoatinina. Ipētauatana, ininiā !kasākirena.

<sup>41</sup>Iuaīkana ikanapiriā Petro, Txiako, Xoão pakinimoni.

—Himakanātapanika? Hītomanātapanika? Iaōpe. Hātapana. Hītari iaxitikiri uatxa sikaākako maerekati kamakanimoni. <sup>42</sup>Hōkitikaua. Masa. Hātapana. Apokaāpota kiki nimīkapiritakiri —itxana.

### Xesosi Maïkiko Pirena

(Mateo 26.47-56; Arókasi 22.47-53; Xoão 18.1-11)

43 Xesosi sãkirauanãtakasaaki, Xotasi apoka. Iua Xotasi Xesosi moianarikamara. Iminana ito kiki, saasara mïkani, piriri mïkani. Sasetotxi auïteakori, kaiökatsoparerini, kiomãtxiakori pakini iokanatarari Xotasi kikiakorikata Xesosi imaïkinina ïkapani. 44 Xotasi mitxipeka säpiretari kikiakori:

—Nota apitxokakiti Xesosipitikarako iua. Iuasaaki himaïkapekariko. Erepaniko hanikasaakiri, imamitekakani ïkapani —itxa.

45 Xotasi apokasaaki, isakatapitipori Xesosimoni. Akiritari:

—Koerekareri.

Inakasaakipeka apitxoka itxari.

46 Inakasaakipeka kikiakori maïka, anika itxarina Xesosi. 47 Kiki iuasaaki iuaã auakari kosekaro saasara. Iua sauãakatari sasetotxi auïte apiatakari nitiri. Itsotakakïpitari. 48 Iuasaakipeka Xesosi:

—Hïte ina himaïkinino ïkapani, saasarakata, piririkata. Kiïtiriri atoko hïtxapeno nota himaïkinino. 49 Ikiniötika nota auanãtari hïtekata Teoso misãkiretiko aikoti äki, noerekarauatakasaaki. Iuaã hïte !imaïkano nota, kotxi Teoso sãkire iökatsopatapeëkaika hïte maïkinino kiïtiriri himaïkini atoko —itxana ninoa.

50 Iuasaakipeka ikinika Xesosi moianariakori miteka, asika itxarina iua. 51 Iuasaaki ätokori sari Xesosi tikini. Iua mäka ätinoka aua iïtoã pirikakari. Kikiakori maïkamari iua. 52 Imãkanoka kaikota iuakoãna. Kasarapeka imiteka iua ätokori.

### Xesosi Xoteo Auïteakori Apisatoõ

(Mateo 26.57-68; Arókasi 22.54a; 63-71; Xoão 18.12-14, 19-24)

53 Ninoa anikari Xesosi sasetotxi auïte apiatakari aapokomoni. Iuaã ikinika sasetotxi auïteakori, kiomãtxiakori, kaiökatsoparerini pakini apotiitaua. 54 Petro ikira atoko isaãpota Xesosi anikakani tikini. Ìroã sasetotxi auïte aapoko piriketakorikä. Iuaã iitopãka sasetotxi auïte apiatakari nitiriakorikata. Iroka xamina tinipoki.

55 Aapokotxi äki sasetotxi auïteakori, ikinika Xoteo auïteakori pakini pimaãna kãkiti:

—Kipa imarotatarari maerekati Xesosi kamini?

Ninoa nirekari Xesosi okiko imaerekani xika. Txamari !apokarina imaerekani imarotakani, kotxi !ikamari maerekati. 56 Kaiãopokori kãkiti

sāpiretari maerekati Xesosi kamakiti, txamari paxirari ninoa sākire, kotxi āti sāpiretakiti ipinimoni, āti sāpiretakiti ipinimoni, itxaāpotana.

<sup>57</sup>Apanakini kiki ōkitikaua, sāpireta itxarina ia aāpirena Xesosi ikamapiretinina. <sup>58</sup>Ninoa:

—Ate kenakotari isāpiretiniri: “Nirikariko ia aiko Teoso misākiretiko aikoti kākiti kamakiti. Ipi āti pakini ōti inakasaaki nikamariko āti aiko kākiti makamakiniti,” itxa isākire.

<sup>59</sup>Txamari ikara sākiretxi āti sāpiretakiti ipinimoni, āti sāpiretakiti ipinimoni, itxaāpota.

<sup>60</sup>Iposo atoko sasetotxi auīte apiatakari tima ikinimane apisatoō. Iua pimaāri Xesosi:

—Kininiāpa na papakapapiretari ninoa sākire? Kixikapa ninoa ikara atoko txanātai? —itxari.

<sup>61</sup>Txamari !kasākireri Xesosi. !Apakapapiretari. Ininiā sasetotxi auīte apiatakari iuaīkana pimaāri:

—Pitekani Teoso mereēkiti txataua? Pitekani Teoso ākiri txataua? —itxari.

<sup>62</sup>Ininiā Xesosi:

—Ari, iua ākiripitikarano. Hātamatariko kākiti itari iaxitikiri topākini Kaposotiireri kikomoni. Hātapariko kākiti itari iaxitikiri uai apokaāpotini katxiāri āki —itxa.

<sup>63</sup>Iuasaakipeka sasetotxi auīte apiatakari matsorākari imāka, kotxi iuākatari Xesosi sākire maerekati ininiua.

—!Anirekaikari Xesosi kamakiti sāpiretakani. Atokopeka. <sup>64</sup>Kotxi hīte kenakotapekari isākire maerekati, “Teoso ākirirano” inini. Natokopa atxatari iua? —itxana.

Ininiā ninoa apakapapiretari:

—Okaākapitikako —itxarina.

<sup>65</sup>Apanakini kiisokari Xesosi. Mākatxi mataā iapirikarina ikiiā oki manapi imatamatakani īkapani. Iposo atoko iāsokarina.

—Pisāpiretaua, kipa āsokai? —itxarina.

Sasetotxi auīte nitiriakori apaka āsokari iua iuakoāna.

### **Petro Kipatari Xesosi Imarotini**

*(Mateo 26.69-75; Arókasi 22.54b-62; Xoão 18.15-18, 25-27)*

<sup>66</sup>Iuasaaki Petro ixiti aua aapokotxi piriketakoriki āki. Sasetotxi auīte apiatakari nitero ātokoro apoka iuaā. <sup>67</sup>Oātamatariki Petro irokanātini xamina tinipoki. Oa mixinitari iua. Ininiā oa:

—Xesosi Nasareekiri moianarikai pite apaka —otxa.

<sup>68</sup>Ininiã:

—Kona, nota !imarotari pisãkire —itxaro.

Iuasaaki pirikere ãronakikoãtaã isari. Iuasaakipeka patari sãkirauata. <sup>69</sup>Oa sasetotxi auïte nitero atamatari iua iuaã.

—Ere kiki iua moianaripitikara —otxana ninoa Petro takote auakani.

<sup>70</sup>—Kona iuano nota —itxa.

Païtiki ninoa iuaã auakani:

—Iua moianaripitikarai. Pite Kariréiakirikarai. Pisãkireëra ate imarotai —itxarina.

<sup>71</sup>Ininiã Petro:

—Nota !imarotari kiki ikara atoko hinanãtakiti. Atãoene nimasãpiretakaniã, Teoso misiritamanoko. Teoso imarotari nota sãkire atãoka nisãpiretinii —itxana.

<sup>72</sup>Ikara atoko Petro inakasaaki, iuaïkana patari sãkirauata. Ininiã Petro xinikari Xesosi sãpiretakiti iuamoni. “Ipikata patari sãkirauatini apisapanikako, ipi ãti pakinikata, ‘!Nimarotari iua,’ pïtxanoko.” Ikara inakari ixinikasaaki, itxiapata.

### Xesosi Pirato Apisatoõ

(Mateo 27.1-2, 11-14; Arókasi 23.1-5; Xoão 18.28-38a)

**15** <sup>1</sup>Katimatiniãkata sasetotxi auïteakori, kiomãtxiakori, kaiõkatsoparerini, ikinimane Xoteo auïteakorikata xinikaxitinãta. Ipaniãtarina Xesosi iaxirikiko. Iposo atoko anika, sika itxarina Piratomoni. <sup>2</sup>Pirato pimaãri Xesosi:

—Pitekani Xoteoakori auïte txataua? —itxari.

Ininiã Xesosi:

—Ari, pisãkire atãopitikara.

<sup>3</sup>Sasetotxi auïteakori apoiãpotari Xesosi, txamari Xesosi !kasãkireri. <sup>4</sup>Ininiã Pirato:

—Na papakapapiretari? Ninoa iteene misãkirepiretai —itxari.

<sup>5</sup>Iuaritika Xesosi !apakapapiretari. Ininiã Pirato ãkixinireë:

—Kinirepa kona apakapapiretari? —itxa.

### Xesosi Okiko Nirekiko

(Mateo 27.15-26; Arókasi 23.13-25; Xoão 18.38b-19.16)

<sup>6</sup>Pãskoa kiiniriti auakasaaki, Pirato itotari isikakiniri kateia ãki auakari kãkiti nireëkiti. <sup>7</sup>Iuasaaki Xesosi maïkikosaaki,

Pahapasi inakori aua kateia āki. Iua Pahapasi apanakini kateia āki auakanikata okaniuatapeka Homanoakori inaiatakasaakina. <sup>8</sup>Pirato sākirauatakasaaki Xesosikata, kākitipokoni apoka Piratomoni.

—Kateia āki auakari pisikaka —itxarina.

<sup>9</sup>Ininiā Pirato pimaāna:

—Hinarekatari nisikakiniri Xoteo auīte hīte īkapani? —itxana.

<sup>10</sup>Pirato iteene imarotari sasetotxi auīteakori sikari Xesosi iuamoni Xesosi ixikotinina xika. <sup>11</sup>Sasetotxi auīteakori maasakana ninoa iuaā apotiitakaniua:

—Hamanaāri Pirato Pahapasi isikakini īkapani —itxana kākitimoni.

<sup>12</sup>Pirato iuaīkana pimaāna:

—Natokopa nitxtari ia kiki Xoteo auīte inakori? —itxa.

<sup>13</sup>Akiripoakatana:

—Aamina ĩpiriāmitakari nopini hītokakitari —itxana.

<sup>14</sup>Ininiā Pirato:

—Kixikapa? Maerekati !ikama —itxa.

Apiata akiripoakatana:

—Aamina ĩpiriāmitakari nopini hītokakitari —itxakatana.

<sup>15</sup>Ininiā Pirato sikakari Pahapasi ninoa īkapani, kotxi inirekari ikamapoxokonitina ninoa kākiti. Eereka ipaniātari Xesosi xirokitatiko aāpitsaā. Eereka Pirato paniātari sotatoakori tokakitiniri Xesosi aamina ĩpiriāmitakari nopini.

### **Sotatoakori Napetiniri Xesosi**

*(Mateo 27.27-31; Arókasi 22.63-65; Xoão 19.1-3)*

<sup>16</sup>Ininiā sotatoakori anikari Xesosi Pirato aapoko āki. Akiritarina ikinika sotato. <sup>17</sup>Iposo atoko ieretakarina mākatxi pōkamarari Xesosi ĩtoā. Ikamarina saporieāta kotipiaro kamakori, taka itxarina Xesosi kiiā.

<sup>18</sup>—Aāuīte —itxarina Xesosi inapetinina.

—Xoteo auītekai pite —itxarina.

<sup>19</sup>Iaritakiitarina aākeē. Ikiisokarina. Ikapotoreēkauana Xesosi apisatoō.

—Aāuīte —itxarina Xesosi inapetinina.

<sup>20</sup>Inapetakarina atoko imakatzakarina mākatxi pōkamarari. Xesosi māka iuaīkana ieretaka. Eereka anikarina Xesosi aamina ĩpiriāmitakari nopini itokakitinirina īkapani.

### Xesosi Tokakitaãka Aamina Īpiriãmitakari Nopini

(Mateo 27.32-44; Arókasi 23.26-43; Xoão 19.17-27)

<sup>21</sup> Īpixinipokoriti itaõkitarina kiki Simão inakori. Sireni sitatxitikiri iua. Iua anaakori Arexãtri, Hopo pakini. Iuasaaki Simão apoka Xerosareẽ. Sotatoakori paniãtari iua:

—Ia aamina Īpiriãmitakari panikinari —itxana.

<sup>22</sup> Anikarina Xesosi ixirataã, Kóokota inakoriãtaã. Xoteo sãkire “Kóokota.” Apanakini akiritari iua oxiratari uãka “Kiitãtãtxi,” inaãka akiritiko. Iuaã apokana. <sup>23</sup> Isikamarina iãriã pinĩtxikata, miha inakorokata, Xesosi iãtini ĩkapani, itsii imimarotakani ĩkapani, txamari !nirekaro iãtiniro. <sup>24</sup> Ininiã itokakitarina aamina Īpiriãmitakari nopini. Eereka ikamarina sarauatxi, Xesosi mãka apakapakani imarotininina ĩkapani. Ikara atoko apanakini anikari Xesosi mãka. <sup>25</sup> Īkanõkapanika novi oara itokakitapeẽka Xesosi aamina Īpiriãmitakari nopini. <sup>26</sup> Aaminaã auari iõkatakítina, apoĩtiko pirena, “Xoteoakori Auĩte” itxa. <sup>27</sup> Ninoa tokakitana ipi kiĩtiririni apaka aamina Īpiriãmitakari nopini, ikikomoni ãti, isanaremoni ãti. <sup>28</sup> Kitxakapirĩka Teoso sãkire iõkatsopatakori txari:

Okapeẽkako iua, kokaniri okiko atoko inapeẽkako.

Ininiã Xesosi okikosaaki ia Teoso sãkire iõkatsopatakori iaõka auapeka iuasaaki.

<sup>29</sup> Ninoa iuaã napakani misãkirepiretapikari Xesosi:

—Kiĩkitei. Pite sãkire: “Nirikariko Teoso misãkiretiko aikoti. Ipi ãti pakini õti inakasaaki nikamari iuaĩkana,” pitxama. <sup>30</sup> Ikara atoko piposotiniã, piteka pimakatxakauako, ininiã pikatxaka aamina Īpiriãmitakariã —itxarina Xesosi inapetinina.

<sup>31</sup> Sasetotxi auĩteakori, kaiõkatsoparerini pakini napetari Xesosi:

—Iua makananitapekari apanakini. Txamari iuaka !iposotari imkananitinia —itxakakana.

<sup>32</sup> —Ikatxakiniãrako ate auikari Teoso mereẽkiti ininiãua.

Ikatxakiniã, aãuikari Isaeo auakani auĩte ininiãua —itxakakana.

Kiĩtiririni iuakata tokakitakoni apaka misãkirepiretari.

### Xesosi Īpinini Pirena

(Mateo 27.45-56; Arókasi 23.44-49; Xoão 19.28-30)

<sup>33</sup> Iuasaaki apaniãxiti ipiãka. Ikini itixitika piãka. Ipi ãti pakini oara ipiãka. <sup>34</sup> Ipi ãti pakini oara napa atoko Xesosi akiripoakata:

—Erii, Erii, aremaa sapakatanii —itxa.

Ia atatsopatakari sākireē: “NiTeosone, niTeosone, kinirepa pítakanapano?” itxa.

<sup>35</sup>Kākiti iuaã auakani kenakotari akirinātini.

—Hikenakota. Akirinātari Eríasi —itxana.

<sup>36</sup>Iuusaakipeka kiki ina katimariã. Iãkari mapoa atoko inakari iãriã katxioãrimoni, aãke mapotökire taka itxari, sika itxari Xesosi iãtini ikapani.

—Mitxipanikako. Maiãtapari. Atauako Eríasi makatxakatapaniri Xesosi —itxana.

<sup>37</sup>Xesosi itapararitika akiripoakata, eereka ipípe itxa. <sup>38</sup>Iuusaakipeka mãkatxi mata Teoso misãkiretiko aikoti ãki arökakari tsorakita. Itano itsorakita. Ixitipeka apoka. Mitxi iua mãkatxi mata !auritari kãkiti ñroini Teosonani Auini Pakitaãtaã. <sup>39</sup>Sotatoakori auíte aua aamina ipiriãmitakari apisatoõ. Ikenakotari Xesosi akiritini. Itikari ipinini.

—Atãopitikara Teoso ãkiri itxaua ia kiki —itxa.

<sup>40</sup>ãTokaka sitoakoro ikira atoko atamanãtarina Xesosi, Maria Matarenama, Saromeema, ãto Mariama, apanakini sitoakorokata. Xosesi, Txiako pakini inoro oa Maria. Iua Txiako maneripanika inakari. <sup>41</sup>Xesosi Kariréia auakasaaki, ninoa sitoakoro moianatari iua. Imiparĩkatarina. Xesosi ipĩkasaakikanera apanakini sitoakoro kaiãopokoro aua iuaãtaã. Ninoa apoka Xerosareẽ Xesosikata.

### **Xesosi Ikatiko Pirena**

*(Mateo 27.57-61; Arökasi 23.50-56; Xoão 19.38-42)*

<sup>42</sup>Ikara õti, Xesosi ipinini õti, kãkiti parĩkauatini õti, kãkiti tomatini õti apisapanika, iuusaaki kikatatikipeka. <sup>43</sup>Iuusaaki Xosee inakori, Arimateia sitatxitikiri, sari Piratomoni. Iua Xosee Xoteo auíte apanakinikata. Ikinimane paxitari iua. Iua apaka iãtapari Teoso ikinimane auíte ininiua õti apokini. Itaparaxinireritika Piratomoni isa, amanaã itxari Xesosi ñto. <sup>44</sup>Ininiã Pirato ãkixinireẽ:

—Atauako patimari Xesosi ipinini? —itxa.

Ininiã ipĩkapiretari sotatoakori auíte. Iua apokasaaki Pirato pimaãri:

—Atauako Xesosi ipípeka? —itxa.

<sup>45</sup>Ininiã iua:

—Ari, ipinapitipeka —itxari.

Ininiã Pirato:

—Panikaikari iito —itxari Xoseemoni.

<sup>46</sup>Iuasaaki Xosee amotari mākatxi mata erekari, arínio inakori. Eereka imaktxakari Xesosi ito. Iapirikari iito mākatxi mataã, anika itxari akauari irikomoni. Kai kisakakori āki ieretakari Xesosi ito. Eereka kai mitapoari ikatika, tota itxari iriko. <sup>47</sup>Ipi Maria itikanātari Xesosi ito takikoãtaã, Maria Matarenama, Maria, Xosesi inakori inoroma pakini.

### Xesosi Iuaĩkana Auāki Inini

(Mateo 28.1-8; Arókasi 24.1-12; Xoão 20.1-10)

**16** <sup>1</sup>Tomatiko õti xipoka atoko mapiānikata, ipi āto pakini sito amotaro kamariāro, Xesosi ito ikamamaritinina ĩkapani, Maria Matarenama, Saromeema, Maria Txiako inoroma pakini. <sup>2</sup>Katimatinĩkata, tomĩkosaaki, ĩkanõkapanika, atokatxi pokĩkasaaki, ninoa sari akauarimoni. <sup>3</sup>Kimaporiã isikasaakina, isãkirauaãpotana: —Kipa makatxakinoua kai auĩte iriko tore? —itxaãpotana. Amaripokori iua kai. <sup>4</sup>Iuaã apokasaakina, atamatarina. Kai maktxakapeẽkaika. <sup>5</sup>Ininiã ĩroãna iriko āki. Atamatarina ātokori topãkanãta ikikomoni. Imãka ĩtanori, kasarori. Ininiã ninoa tikoka.

<sup>6</sup>Ininiã iua:

—!Hĩtikokape. Hĩte nitanātari Xesosi Nasareekiri, aamina ĩpiriãmitakari nopini tokakitakori. Ōkitikapekaua iua. !Auaika uai. Hãtamata. Mitxi itakarina iito uai. <sup>7</sup>Hĩsipeka. Hĩsãpiretari Petro, apanakini Xesosi moianariakori pakini: “Xesosi sapanikako hĩte apisa Kariréiamoni. Iuaã hĩte aõkitari iua, kotxi ipinaka apisapanika isãpiretapekari ikara hĩtemoni,” —itxana ninoa.

<sup>8</sup>Itimaritikana ninoa pokĩka. Imitekana. Ikikinanakana, ipĩkarena xika. !Isãpiretarina apanakini, kotxi ipĩkarauatana.

### Xesosi Oerekaua Maria Matarenamoni

(Mateo 28.9-10; Xoão 20.11-18)

<sup>9</sup>Xesosi õkitikasaakia ipinaka atoko ĩkanõkapanika semana potorikini õti, tomĩkosaaki, oerekaua merepitipanika Maria Matarenamoni. Mitxipe Xesosi aõkitakasaakiro oa Maria, omitikari maerekani matamatakoni setxi pakini oa itoã auakani. <sup>10</sup>Xesosi õkitikasaakia, iua oaõkitaka atoko, osari merepanika Xesosi moianariakorimoni. Iuasaaki iteene imatinaniuatana. Itxiapanãtana. Osãpiretana ninoa:

<sup>11</sup>—Xesosi iuaĩkana auāki itxapeka. Nota aõkitari iua —otxana. Txamari ninoa kona auikari osãkire.



### **Xesosi Oerekaua Ipi Imoianariakorimoni**

(*Arókasi 24.13-35*)

<sup>12</sup>Eereka iuaka oerekaua ipi imoianariakorimoni, kimaporiã isikasaakina aapokotxi mauakaniãtaã. Iuasaaki itoõ ipinipo itxa.  
<sup>13</sup>Eereka ninoa kanapiriã. Isãpiretana apanakini imoianariakori, txamari !auikarina isãkirena.

### **Xesosi Oerekaua Imoianariakorimoni**

(*Mateo 28.16-20; Arókasi 24.36-49; Xoão 20.19-23*)

<sup>14</sup>Eereka Xesosi oerekaua õsi imoianariakorimoni inipokotakasaakina. Xesosi õtãkikana:

—Kinirepa hïte !auikatari nota iuaïkana auãki ninini? Kinirepa !hãuikatari nota aõkitakani sãkire? !Kaiokakarekii —itxa.

<sup>15</sup>Iposo atoko Xesosi txana:

—Ikini itixiti hïsako. Hïsãpiretariko Teoso iokanapirena erekari ikinimanemoni. <sup>16</sup>Teoso sãkire auiaãkari patxisatakori, iuarako sari Teoso tixinemoni. Teoso sãkire mauikakati, Teoso misiritapikariko. <sup>17</sup>Teoso sikaposotiiretanako isãkire auiaãkani, ininiã apanakini imarotari Teosokara sikari iposotiire ninoamoni. Ia atoko Teoso sikaposotiiretana. Omitikarina maerekani matamatakoni nota uãkaã. Isãkirauatana imimarotakinitina sãkiretxitiã.

<sup>18</sup>Imaïkiniãrina imini, !lipinana. Iãtiniãrina ikianari, !amianatana. !Ipinana. Itakauakotaua amianatakani nopini, ininiã amianatakani makananitaãka —itxa Xesosi sãkire.

### **Xesosi Anikaãka Teoso Tixinemoni**

(*Arókasi 24.50-53; Átosi 1.6-11*)

<sup>19</sup>Imoianariakori imisãkiretanapaka atoko, Xesosi anikaãka Teoso tixinemoni. Iuaã iua topãka Teoso kikomoni. <sup>20</sup>Xesosi moianariakori eereka isipekana, Teoso sãkire ikini aapokotxiti auakani isãpiretinina ïkapani. Apiananiri moianatana. Apiananiri sikaposotiiretana ninoa, ininiã apanakini imarotari ninoa sãpiretakiti atão inini. Ameẽ.